

Israel aleripa yërulune Egipto

Éxodo 1.1-20.21

Yëkkuö i' kiè si'kuaie *Éxodo*, e' wà kiane chè *yërulune*. Kam sa' tö yëkkuö i' mane'ù seraä se'ie, ishābōts maneö' sa' tö dō capítulo 20.21. Ì maneö' sa' tö e' blatëule mañat tsíní. Et tsíní e' dör capítulo et dō capítulo dabom eyök kí skel (1-15). Iët tsíní e' dör capítulo dabom eyök kí teröl dō capítulo dabom eyök kí pàköl (16-18). Ibata ék tsíní e' dör capítulo dabom eyök kí sulītu dō capítulo dabom böyök (19-20).

Et tsíní e' tö se' a ipakè tö ì bak Israel aleripa tã ie'pa míã Egipto e' tsatkök ketba yöki e' ukuöki. Kewe ie'pa kawö tka buaë Egipto. Ie'pa ena ie'pa iyiwak alöne taië. Kã tka taië tã egiptowak suanémi dō' Israel aleripa e' alòkã ie'pa ki. E' kuëki ie'pa tö Israel aleripa sué suluë tã iwe'ikérakitö siarë. Ie'pa kérakitö kanëblök darërëë kè patuëta'. Erë Skëköl tö ie'pa weirke e' sué tã wëm kékaitö eköl ie'pa yöktsã egiptowak ulã a. Wëm e' kiè Moisés, e' è tö yëkkuö i' kit. Skëköl e' kkayë' ie' a tã iwák kiè yë'itö ia. E' ukuöki tã ipatkéitö Israel aleripa yöktsã Egipto. Moisés tö iché Egipto blú a tö Israel aleripa ómine. Erë Egipto blú kè éna Skëköl ttò iütak. E' kuëki Skëköl tö egiptowak we'iké siarë tsakië ie' diché taië wa. E' wa ie' tö ikkaché ie'pa a ena Israel aleripa a tö yi dör ie'. Skëköl tö Israel aleripa tsatkée yéttsã Egipto ie' diché taië wa, e' wa ie'pa de ie' ichaie ena ie' de ie'pa Këkölíe. Ie'pa yënetsã Egipto e' kéwö tkö'uk ie' tö ie'pa patké duas bit ekkë.

Iët tsíní e' tö se' a ipakè tö wës Skëköl tö ie'pa wëttsë' ena ie'pa kime'itö shkōk-tkō kã sir poë wé kè yi serku' ee. Eré ie'pa tö ie' tsiriwé taië kabene wa, erë ie' tö ie'pa tié ena ie'pa tsatkéitö ibolökpa yöki er bua' wa.

Ibata ék tsíní e' tö se' a ipakè tö Skëköl ena Israel aleripa ttè me' ñi a. Mik ie'pa de Sináí kébata a, etã ie' tö ittè dalöiëno mé ie'pa a dökã dabop. Ie' tö iché ie'pa a tö ie'pa tö ie' ttè dalöiëno e' kos iüté buaë, e' tã ie'pa dōraë ie' wák icha chókíe ena ie'pa a ie' er buaë chōraë kã malepa wakpa tsatã.

**Israel aleripa tso' Egipto
e'pa weine taië**

1 ¹⁻⁴Israel kiè ñies Jacob e' ala'r dè'mi Egipto ie' ta, e'pa kòs yamipa ta'. Ie'pa kiè Rubén, Simeón, Leví, Judá, Isacar, Zabulón, Benjamín, Dan, Neftalí, Gad ena Aser. ⁵Jacob yamipa mìnè ie' ta Egipto e'pa dòka dabom kuryòk (70) sera. Erè José, e' tso'tke Egipto kewe iyamipa yòki.

⁶Kawò tka taië, età José ena ièlpa blèrulune. Ñies iyamipa dè'mi Egipto ie'pa ta, e'pa kòs blèrulune se. ⁷Erè Israel aleripa alòne taië, e' kueki ie'pa de diché ta' taië. Ie'pa tso' Egipto wa'ñe.

⁸E' ukuòki ta' blu' ské tkènekà ekòl e' kè wà José pakè jcher. Ie' tò iché egiptowak a: ⁹“Ye' ttò ttsó. Israel aleripa dör taië. Ie'pa diché tkòka se' diché tsata, dö' ie'pa e' alòka se' ki. ¹⁰Mik se' bolòkpa ñippòmì se' ta, e' ta dö' ie'pa ñi wöiòka se' ppòk se' bolòkpa ta, ta es imi'miyal se' yòki. E' kueki se' tò ibikeitsó bua'iewa tò wes se' tò ie'pa wòklò'wèmi as kè ikí alör taië.”

¹¹E' kueki egiptowak tò iwòkirpa patké Israel aleripa we'ikòk kanè darèrè wa as ieriardak. Ie'pa tò ikérak ká yuòk böt chkewò dapa'woie Egipto blú a. Ká e' kiè Pitón ena Ramsés. ¹²Israel aleripa we'ikeke ie'pa tò siarè, erè ikí alörkerak taië. E' kueki egiptowak suarke taië ie'pa yòki.

¹³Egiptowak tò ie'pa ké kaneblòk kèsik wa. ¹⁴E' tò ie'pa eriauwé taië. Ikérakitò skauchka yuòk shtrót shtrót u yuoie. Ñies ikérakitò kaneblòk kañika kanè ulitane uk. Es Israel aleripa kòs we'ikérakitò siarè. ¹⁵E' kíie ta' Egipto blú tté alakòlpa kiè Sifrá ena Puvá e'pa ta. Ie'pa dör hebreowak* alakòlpa alá kurke e' kanèukwakpa. Ie' tò iché ie'pa a:

¹⁶—Mik a' tò hebreowak alakòlpa alá kurke, e' kaneweke, età isaú ùi iwák dör? Iwák wèm e' ta ittòwa. Iwák dör alakòl, e' ta imúat, kè ittarwa.

¹⁷Erè alakòlpa e'pa tò Skèkòl dalöieta'. E' kueki ie'pa kè wà Egipto blú ttò iutène wes itò iché es. Ie'pa ala'r wèpa méat ttsè'ka. ¹⁸Età Egipto blú tò ie'pa kiére ta' ichéitò iarak:

—¿Iók a' tò iwamblé es? ¿Iók a' tò ala'rla wèpa e' méat ttsè'ka?

¹⁹Ie'pa tò iutè:

—Hebreowak alakòlpa kè alá kur wes egiptowak alakòlpa es. Ie'pa alakòlpa dör darèrè. Ie'pa alá kur bet buaè. Mik sa' demi, età ie'pa alá kunetke.

^{20,21}Es Israel aleripa kí alònèmi taië. Ie'pa diché kí iërke taië. Sifrá ena Puvá e'pa tò Skèkòl dalöieta'. E' kueki Skèkòl tò ie'pa kímé, ala'r méitò ie'pa a taië.

²²Età Egipto blú tò ikuèblupa ulitane a kawò mé tò hebreowak ala'rla wèpa kune kòs e' ómi di' ki. Alakòlpala è múat.

* 1.15 hebreowak: E' kiè ñies Israel aleripa.

Moisés kune'

2 ¹E' kēwō ska' t̄a wēm ekōl dōr Leví aleri, e' senēw̄a alakōl dōr Leví aleri ñies ese t̄a. ²Et̄a ie' alà skà kéka e' dōr wēm. Et̄a im̄i tō isué tō alala buaala, e' kuēki ibléw̄aitō dō si' mañat. ³Mik im̄i kē a ilà blēneia, et̄a ie' k̄kó yulé et, patiē buaē kiōchka tso' chkuā'chkuā ese wa as kē a di' tkōw̄a. E' ukuōki t̄a alala iéw̄aitō k̄kó a, méreitō di' kiē Nilo e' k̄kōmik k̄kō tso' e' shuā. ⁴Et̄a alala kutà e' dués̄er k̄amiē ik̄i sauk tō wēs idōmi.

⁵E' ukuōki t̄a Egipto blú e' alà busi m̄iā kuōk di' a. E' dalewa tayēpa tso' ie' w̄a ikanē mēsopaie e'pa shkō iēter ákitō ki. Et̄a ie' tō k̄kó sué k̄kō shuā. Ikanē mēsopa ekōl patkém̄iitō itsukbitu. ⁶Et̄a ie' tō ikkōkéka t̄a isué tō alala wēm a'ria ekōl e' iuke. Ie' isué er siarē wa t̄a ichéitō:

—Bēbēla i' dōr hebreowak.

⁷E' wōsh̄a bēbēla kutà de t̄a ichéitō ia:

—¿Be' ki ikiane tō ye' mi' tayē hebreowak yulōk ekōl be' a alala se k̄kō'noie as itala'ñitō itsu' wa?



Moisés m̄i tō iiek̄a k̄kó a itsatkoie. (Éxodo 2.3)

⁸Età Egipto blú alà busi tò iüté:

—Be' yú iyulök.

Età bēbēla kutà míā imì yulök tã idebitu iwā. ⁹Età Egipto blú alà busi tò iché alà mì ā:

—Alà i' tsúmi kk'ónú ña tala'ú ña buaē. Ye' tò be' patueke iki. Età imì wā ilà mítser tala'wē. ¹⁰Mik alà de bērie, età imì wā ibitetserne Egip-to blú alà busi ā. Età ie' tò iklō'wé wes ie' alà ekka es. Ikiè mékãitō Moisés.* Ie' tò iché:

—Ye' tò iyē'ttsa di' ā.

E' kuekī ie' tò ikiè mékã es.

Moisés tso' Egipto e' tkashkar

¹¹Moisés kibineone. Kã et tã ie' míā iyamipa hebreowak, e'pa pakök. Etã ie' tò isué tò iyamipa weirke siarē kanēblök darērē. Etã ie' isué tò egiptowak eköl tso' iyami hebreowak eköl e' ppök siarē. ¹²Etã ie' kã sué kã wa'ñe. Kē ie' wā yi sune. E' dalewa ie' tò egiptowak e' ttéwā inú wötéwā ie' tò tsa'wō ā. ¹³Bule es tã ie' skà e' yé'ttsa, età ie' isué tò hebreowak böl tso' ñippök ñitã. Ie' tò iëköl tso' eköl ppök, e' ā iché:

—¿Iók be' tso' be' yami ppök?

¹⁴Etã hebreowak e' tò iüté:

—¿Yi tò be' tkékã sa' wökirie sa' shülökwakie? ¿Be' tso' ye' bikeitsök ttéwā wes egiptowak kötwaḅ es?

Mik ttē e' ttsé Moisés tö, età e' tò ie' suawé. Ie' ibikeitsé: “Ie'pa wā ijchēnewā tò ye' tò egiptowak kötwa.” ¹⁵Mik e' jchēnewā Egipto

blú wā, età ie' tò Moisés ttök-wā patké. Erē Moisés tkashkar ie' yökī, míā senuk kã kiè Madián eē. Eē ie' e' tkére di' tum biule kkömik.

¹⁶Kã e' ā sacerdote* serke eköl kiè Reuel. E' alà busipa döka kul. E' diwō wa alà busipa e'pa dē'bitu di' chkök kul' ā mè iyé iyiwak ā yē. ¹⁷Etã iyiwak kk'ónukwakpa skà wēpa debitu busipa trē'wēmi. Etã Moisés e' kékã e' tò busipa tsatkée. Etã ie' tò di' mé iyiwak ā. ¹⁸Mik ie'pa demine iyé ska', età iyé tò ie'pa ā ichaké:

—¿I wa i'ñe a' dene bet?

¹⁹Ie'pa tò iüté:

—Egiptowak eköl tò sa' tsatkée iyiwak kk'ónukwakpa ulā ā. Ie' di' yé'ttsa mé iyiwak ā.

²⁰Iyé tò iché iã:

—¿Wé wēm e'? ¿Iók a' iméat ekör-la? A' yú itsukbitu as ichkò se' tã.

²¹Es Moisés e' tséat senuk wēm e' ska'. E' ukuökī tã Reuel tò ilà busi kiè Séfora, e' mé Moisés ā senowaie itã. ²²Etã Moisés alà kékã eköl kiè mékãitō Guersón* wã chéitō: Kã i' kī ye' dör o'ka.

²³Duas tka taiē, età Egipto blú blēnewā. Erē Israel aleripa kköchökeia taiē kēkraē kanē darērē kuekī. Ie'pa kköchöke taiē e' ttsé Skököl tö. ²⁴Ttē me'bak ie' tò Abraham ā ena Isaac ā ena Jacob ā e' wã tsá detke kanewē. E' kuekī ie' tò ibikeitsé tò Israel aleripa

* 2.10 Moisés: Hebreoie s'kiè e' wã kiane chē iyēulettsa.

* 2.16 sacerdote: Kē se' wā ijcher yēsýēsē tò sacerdote wēse e' dör, erē kē idör wes i'ñe itso' es.

* 2.22 Guersón: Hebreoie s'kiè e' wã kiane chē kã bánet wakpa.

kimeraëyö i' tã. ²⁵Ie' tō ie'pa sué tã
ie' éna iane tō ì tköke ie'pa tã.

**Skëköl tō Moisés patké
Israel aleripa tsãtkök**

3 ¹Ká et tã Moisés tso' inuáki
Jetró,* e' iyiwak kkö'nuk.
Inuáki kanëblöke sacerdoteie
Madián. E' dalewa ie' wã inuáki

iyiwak mítser kã sir po, e' jaishet,
demi Skëköl kébata kiè Horeb* eë.
²Eta eë Jehová biyöchökwak bua'ie
e' e' kkachéwã ie' a bö' wörkueie
taië kal tsir elka shuã. Moisés tō
isuéwã bua'ie tã isué tō kal wöba-
tsekã taië bö'ie, erë kè ñarwa. ³Eta
Moisés tō ibikeitsé: “¿Wì dör ì? Ye'
mí isaük ì kuekì kal wì kè ñarwa.”



*Skëköl e' kkaché Moisés a bö' wörkue-
ie taië kal tsir elka shuã. (Éxodo 3.2)*

* 3.1 *Jetró*: E' dör Moisés nuáki. Ie' kiè ñies Reuel ena Hobab.

* 3.1 *Horeb*: E' kiè ñies Sinaí.

⁴Mik Jehová tō isué tō Moisés dökewatke ts̄inet bö' ñarke e' ɔ'mik isaṁk, eṭa Skëköl tō ichaké:

—iA Moisés! iA Moisés!

Moisés tō iüté:

—¿Ì?

⁵Eṭa Skëköl tō iché ia:

—Kè be' dökwa ts̄inet. Wé be' dur e' ké dör batse'r, e' kueḱi be' klökkuö yóttsa. ⁶Ye' dör be' yé e' Këköl ena be' yépa bak ká iaiaë kiè Abraham, Isaac ena Jacob e'pa Këköl.

Moisés suane Skëköl saṁkwa, e' kueḱi ie' e' wöpabakéwa. ⁷Erë Jehová tō iché ia:

—Ye' isué tō wépa dör ye' icha tso' Egipto e'pa weirke siarë. Ie'pa kköchöke taië ikanë wökirpa ulà a e' ttséyö. Ye' wa ijcher buaë tō iweirkerak siarë. ⁸E' kueḱi ye' dë'ttsa ie'pa tsatökök egiptowak ulà a. Ye' tō ie'pa yerattsa ká e' ki. Ye' wa ie'pa miraë ká taië buaë ese ki. Ká e' ki íyi ulitane tskir buaë, iwà wör buaë shütë.* Ká e' ki pè' tso' taië. E'pa ditséwöpa dör canaánwak, hititawak, amorreowak, fereseowak, heveowak, ena jebuseowak. ⁹Ittsó, ye' tō Israel aleripa kköchöke e' ttsé. Ye' tō isué tō egiptowak tō ie'pa we'ikeke siarë. ¹⁰E' kueḱi ye' tso' be' patökök Egipto blú ska' Israel aleripa dör ye' icha e'pa yökulur Egipto a. Be' yú Egipto.

¹¹Erë Moisés tō iché ie' a:

—¿Yi ye' dör e' dōwami Egipto blú wörki Israel aleripa yökulur ie' ulà a?

¹²Ie' tō iüté:

—Be' kè mi'pa ekörla. Ye' tso' be' ta be' kimuk. Mik be' tō Israel aleripa yélur Egipto a, eṭa a' tō ye' dalöieraë kabata i' ki. E' wa be' wa ijcherdaë tō ye' wák tō be' patkë'.

¹³Erë Moisés tō ie' iüté:

—Dö' ye' mia ta ye' tō ichè ie'pa a: “A' yépa bak iaiaë e' Këköl tō ye' patkë' a' tsatökök.” Dö' ie'pa tō ye' a ichaké: “¿Ima e' kiè?”, e' ta ¿i chëmi ye' tō ie'pa a?

¹⁴Eṭa ie' tō iüté:

—Ye' dör yi tso'tke e'. Ichó ie'pa a tō Ye' Tso'tke e' tō ye' patké a' ska'.

¹⁵Skëköl tō ikí ché Moisés a:

—Ñies ttè i' chó Israel aleripa a: ‘Se' yépa bak ká iaiaë kiè Abraham, Isaac ena Jacob, e'pa Këköl kiè Jehová* e' tō ye' patkë' a' tsatökök.’ Ttè e' chó ie'pa a. Ye' kiè dör Jehová i' dör ye' wák kiè kekraë. Kiè i' wa ye' kirdaë aishkuö ta kekraë.

¹⁶Be' yú Israel aleripa kueḱlupa dapa'uk ta ttè i' ichó ie'pa a: ‘Jehová, dör se' yépa bak ká iaiaë kiè Abraham, Isaac ena Jacob e'pa Këköl e' e' kkeyé' ye' a ta ye' a iyé'itö tō ie' tō a' weirke siarë egiptowak ulà a e' sué. ¹⁷Ñies ye' a iyé'itö tō a' tsatkeraëitö egiptowak tso' a' we'ikök e'pa ulà a. Ie' wa a' miraë ká buaë ese ki. Ká e' ki íyi ulitane tskir buaë, iwà wör buaë shütë. Ká e' wakpa ditséwöpa dör canaánwak, hititawak, amorreowak, fereseowak, heveo-

* **3.8,17** *Ká e' ki íyi ulitane tskir buaë, iwà wör buaë shütë*: Ttè e' dör Hebreoie i' es: Wé baka tsu'diö ena bul alí shköke di'ie.

* **3.15** *Jehová*: Hebreoie kiè e' wì dör ye' tso'tke.

wak, ena jebuseowak.' Ttè e' ch'ó ie'pa a. ¹⁸Israel aleripa kuëblupa tò be' ttò ttersaë tã be' yú ie'pa tã Egipto blú ska' tã ttè i' ch'ó ie' a: 'Jehová dör hebreowak Këköl, e' dë'bitu sa' wöki. E' kuëki sa' ómi kã mañat shkar ekkë wé kè yi ku' ese ska' iyiwak ña'uk Jehová dör sa' Këköl e' dalöioie.' Ttè e' ch'ó ie' a. ¹⁹Erë ye' wã ijcher buaë tò ie' kè tò ie'pa a kawö e' mepa ëanas. Ye' kawöta ie'pa yöktsa ye' diché taië e' wa. ²⁰E' kuëki ye' diché taië e' kkacheraëyö egiptowak a. Ì weraëyö ie'pa shua e' tò ie'pa tkiweraë. E' wa ie'pa we'ikeraëyö siarë. E' ukuökì tã Egipto blú tò Israel aleripa erami as imi'yal. ²¹Ñies ye' tò egiptowak keraë ie'pa dalöiök taië. E' kuëki mik a' e' yökettsa Egipto a, etã a' kè minuk ulà wöchka. ²²Israel aleripa e' alakölpã qos e'pa tò íyi yöule inukölchka wa ö orochka wa ö datsi' ese kak kieraë egiptowak alakölpã serke bänet ö iserkerak Israel aleripa u a esepa a, e' qos ieraë a' ala'r tò. Es a' tò íyi bua'buã tso' taië Egipto e' yerattsã ie'pa ulà a.

4 ¹Erë Moisés tò iüté:
—Ie'pa kè tò ye' ttò klö'wepã. Kè itö ye' ttò iütepã. Ie'pa tò ye' a icheraë: "Jehová kè dë'bitu be' ska'."

²Etã Skëköl Jehová tò ie' a ichaké:

—¿Ì a'tser be' wã ulà a?

Moisés tò iüté:

—Ye' shko kéli.

³Jehová tò iché ia:

—iIuyómi iski!

Etã Moisés tò iuyémi iski. E' wöshã tã ishko kéli yönane tkabèie. Moisés e' skéu iyökì bet ⁴erë Jehová tò iché ia:

—iIklö'úwã ikirë bata a ulà wa!

Etã Moisés tò iklö'wéwã etã imíãne shko kéliie.

⁵Etã Jehová tò iché ia:

—Mik be' dene Egipto, etã be' tò iú es as ie'pa tò iklö'ú mokì tò ye' dör a' yépa bak kã iaiaë kië Abraham, Isaac ena Jacob e'pa Këköl e' e' kkaché be' a. ⁶I' tã be' ulà tiúwã be' batsi' a.

Etã Moisés ulà tiéwã ibatsi' a. Mik ie' ulà yéttsã, etã ie' isué tò iwölinekã saruruë duë kië lepra e' wã. ⁷Etã Skëköl tò iché ia:

—Be' ulà skã tiúwãne be' batsi' a.

Etã Moisés tò iwé es. Mik ie' ulà yéttsãne, etã ie' ulà buanene buaë. ⁸E' ukuökì tã Skëköl tò iché ia:

—Ì kkachéyö be' a kewe e' kè klönerak iwã, ñies ie'pa kè wã be' ttò iütëne, e' tã iët skã ú. Isalema e' klö'wëmi ie'pa tò. ⁹Erë e' qos wa ie'pa kè wã be' ttò klöne be' ttò iütëne e' tã di' chkóka di' kibi a e' tótttsã kã sí ki. Mik e' ténettsã kã sí ki etã di' miãraë péie.

¹⁰Moisés tò iüté:

—iAyëwë! iA ye' Këköl! Ye' siarala, kè tto buaë. E' kè dör i'ñe ème be' ttöke ye' tã etã. Es ye' wák dër kã iaiaë. Ye' ttò enaë. Ye' kè a s'iütër buaë.

¹¹Erë Jehová tò iüté:

—¿Yi tò a' a kkò méat? Ye' wák tò a' méat kè tto ö kè kukuö wattser. Ñies a' wöbla kè wawër ö a' wöbla wawër e' qos méat ye'

wák tö a' a. ¹²E' kuëkî be' yú. Mik be' ttöke, etä ye' tso' be' ta. Ì kiane ye' kî tö be' tö ichè, e' kkacheraë ye' tö be' a.

¹³Erë Moisés tö iché ia:

—iA kékëpa! Ye' kköchò be' a tö o'ka patkómi ye' skéie.

¹⁴Etä Jehová ulunekä ie' kî ta ichéitò ia:

—E'ma be' èl Aarón dör Leví aleri çîma e' bikeitsè be' tó? Ye' wä ijcher tö ie' ttò buaë. Ie' tso'tke ñalä kî datse be' ska'. Mik ie' tö be' sué, etä e' tö ie' ttsé'wèmi buaë. ¹⁵Ì kos chak be' éna e' kos chó Aarón a as ie' tö ichòne. Ye' wák tö a' böl kîmeraë as a' ttò buaë. Ì kiane ye' kî tö a' tö iwè e' kkacheraë ye' tö a' a. ¹⁶Aarón ttöraë be' skéie. Ie' döraë be' ttekölie wes be' dör ye' tteköl es. Ì cheke ye' tö be' a e' cherane be' tö ie' a ta e' cherane ie' tö a' yamipa a. ¹⁷Shko kéli se tsúmi. E' wa ì kè or yi a ese weraëbö. Ie'pa wökrardawä iweblök.

Moisés míane Egipto

¹⁸E' ukuökî ta Moisés míane inuäki, Jetró ska' ta ichéitò ia:

—Kawö mú ña. Ye' kawöta shkökmine Egipto ye' yamipa sauk tö itso'iarak ttsé'ka.

Etä Jetró tö iüté:

—Èkékè. Be' shkó wöbla wa.

¹⁹Moisés tso'ia Madián, etä Jehová tö iché ia:

—Yi kî be' kiarke ttèwä Egipto, e'pa blèrulune. Kè ì dalò ta'ia be' kî ee. E' kuëkî be' yúne Egipto.

²⁰Etä Moisés tö ilaköl ena ila'r tkéka burro kî ta imíyal Egipto. Ie' wä Skéköl shko kéli dami ulà a.

²¹Jehová tö ie' a iché:

—Mik be' demi Egipto, etä ye' tö diché me'bak be' a ì kè or yi a ese woie, e' wakaneü kröröë Egipto blú wörki. Erë ye' tö ie' a er suluë meraë as kè ie' tö Israel aleripa òmine. ²²Etä ttè i' chó ie' a: 'Jehová tö iché be' a: Israel aleripa dör wes ye' alà wëm tsá es. ²³Ye' tö be' a ichétke tö ie'pa ómine as imi'yalne ye' kîkökka. Erë be' kè wä ie'pa a kawò mène as imi'yal. E' kuëkî be' alà wëm tsá e' tterawayö. Ttè e' chó ie' a.

²⁴Moisés ena iyamipa minia ñalä kî etä wé ie'pa kapökerò ñalä kî, ee Jehová debitu Moisés ska' ittökwa. ²⁵Erë Moisés alaköl Séfora e' tö ák di'dië klò'wéwä e' wa ilà tottola kkuölit téé tsir. E' kkuölit takla pé wa ie' tö Moisés klò patié ta ichéitò Moisés a: "Mokî be' tso'ia ye' wèmie pé i' wa."

²⁶Etä Jehová tö Moisés émi. (Séfora tö ilà tottola kkuölit téé tsir e' kuëkî ie' tö iché Moisés a tö "be' tso'ia ye' wèmie pé i' wa.")

²⁷Etä Jehová tö Aarón a iché:

"Be' yú Moisés ñalé yulök wé kè yi serku' ee." Aarón mía Moisés ñalé yulök ta ie' ikué Skéköl kébata a. Ee ishke'wéitò wöalattsè wa. ²⁸Etä ì kos chök Jehová tö Moisés patkè, e' pakéne Moisés tö Aarón a. Nies ì kè or yi a ese kkayè' Jehová tö Moisés a wawè e' kos pakéneitò Aarón a.

²⁹E' ukuökî ta ie'pa böl míyal Israel aleripa kuëblupa dapa'ukka kapakök ie'pa ta. ³⁰Ì kos yè' Jehová tö Moisés a e' pakéne Aarón tö Israel aleripa kuëblupa a. Nies ì kè

or yi a ese kKayè! Jehovahá tò Moisés a e' kos wé Moisés tò Israel aleripa ulitane wörki.

³¹Israel aleripa tò Aarón ttè klò'wé. Mik ie'pa éna iane tò Jehovahá éna ie'pa dalërke, ñies tò ie'pa weirke siarè e' suéitò, etä ie'pa e' wöewa iski ie' dalöiök.

Moisés ena Aarón tté Egipto blú tã

5 ¹E' ukuökí tã Moisés ena Aarón míyal Egipto blú ska' tã ichéitò iã:

—Jehová dör Israel aleripa e' Këköl, e' tò iché be' a tò e'pa dör ie' icha. Ie'pa ómi as imi'yal wé kè yi serku' eé kawö tkö'uk ie' dalöioie.

²Erè Egipto blú tò iüté:

—¿Yi dör Jehovahá? Ye' kè wã ie' suule. Ye' kè kawöta ie' ttò iütök. Ye' kè kawöta Israel aleripa ökmi. E' kueki kè ye' tò Israel aleripa epami.

³Etã ie'pa tò iché:

—Hebreowak Këköl e' dë'bitu sa' wöki. E' kueki sa' ómi kã mañat shkar ekkè wé kè yi ku' ese ska' iyiwak ña'uk sa' Këköl Jehovahá e' a idalöioie dö' ie' tò sa' wömëttsa duökwa dué a ö tabé a.

⁴Erè Egipto blú tò iüté:

—A Moisés. A Aarón. ¿Iók a' ki ie'pa kiane wöklö'wé ikanè a? iA' ena a' yamipa yúshka kaneblök!

⁵Ñies Egipto blú tò iché ie'pa a:

—I'ñe tã Israel aleripa tso' taië kã i' ki, etã çwes a' ki ikiane tò ie'pa kè kaneblöia?

⁶E' diwö wa Egipto blú tò iché ikanè wökirpa a:

⁷—Tala'chka kösi e' kè tsarbitüia Israel aleripa a skauchka shtrót shtrót yuoie wes se' tò ikane-wèrö es. As ie'pa wákpa mi' itsuk. ⁸Erè ikórak iyuök kos këkraë iyuekerakitö ekkè, kè wöarwa yës. Ie'pa bikënak è taië, e' kueki ie'pa arkerak: 'iMishka iyiwak ña'uk se' Këköl a!' ⁹Ie'pa kí kó kaneblök darërëë. Kanè mú ie'pa a taië as kè itö kachè iütö.

¹⁰Etã ikanè wökirpa míyal tã ichéitörak Israel aleripa a: —Egipto blu' tò kawö mé tò kè a' a tala'chka kösi tsarbitüia. ¹¹I'ñe tã a' wakpa kawöta iyulök wé a' ikué, e'ma eé itsúbitu. Erè a' kawöta iyuök kos a' iyueke kenet ekkè, kè wöarwa.

¹²Etã Israel aleripa míã Egipto kã wa'ñe kachka èse yulök tala'chka skéie. ¹³Kanè wökirpa tò ikérak kaneblök kësik wa tã ichekerakitö ie'pa a këkraë: "A' tò iyuó kos a' tò iyueke kenet mik sa' tò tala'chka mekeia a' a ekkè." ¹⁴Egiptowak tò Israel aleripa welepa me'kã ñi wöki-rie. E'pa ppeke egiptowak tò ttsa' bata wa tã ichekerakitö ie'pa a:

—¿I' kueki a' kè wã iyöne chki ena i'ñe wes kenet es?

¹⁵Etã Israel aleripa kanè wökirpa míyal kköchök Egipto blú wöã. Ie'pa tò iché iã:

—A këképa. ¿I' kueki be' tò be' kanè mésopa we'ikè es?

¹⁶Tala'chka kè mèneia sa' a, erè ie'pa ki ikiane tò sa' tò iyue kos sa' a tala'chka merkeia tã iyörke ekkè. Ie'pa tò sa' ké kaneblök kësik wa. Ñies sa' ppekeitö siarè. iA këképa, be' wakpa iane iwiie!

¹⁷Egipto blú tò ie'pa iüté:

—iA' dör bikëwakpa wöchka! E' kuekì a' icheke kekraë: “iMishka ká bänet iyiwak ña'uk Jehová a!” ¹⁸iA' yúshka kaneblök! Eré kè tala'chka kósi merku'ia a' a, eré a' kawöta iyuök kos kenet a' tò iyueke ekkë.

¹⁹Mik Israel aleripa kanè wökirpa a iyène tò ie'pa kawötä iyuök kekraë kos iyuekerakitö kenet ekkë, etä ie'pa eriane tajë. ²⁰Ie'pa e' yélur Egipto blú ska' de wé Moisés ena Aarón tso' ie'pa panuk ee. ²¹Ie'pa tò iché iarak:

—Ï wamblé a' tò sa' kì e' kuekì as Jehová tò a' we'ikò. Egipto blú ena ikueblupa e'pa éna sa' ar suluë. A' iane iwiie. E' dör wes a' wakpa tò tabè mé ie'pa a as sa' ttòwä ie'pa tò es.

Moisés kköché Skököl a

²²Etä Moisés tò iché Jehová a:

—A Jehová. ¿Iók be' tò Israel aleripa we'ikeke siarë? ¿Iók be' tò ye' patkë'bitü íe? ²³Mik ye' dé'bitü ttök Egipto blú ta' be' ttò wa, etä ie' tò wépa dör be' icha e'pa kí we'iké siarë. Dò ikkë ta' iweirkeia iwák suë. Eré be' kè wä ì one yës ie'pa tsatkoie.

6 ¹Etä Jehová tò ie' iüté:
—Kukuie bö isueraë tò wes ye' tò Egipto blú we'ikeraë. Ye' diché tajë e' wa ye' tò ie' keraë ie'pa ökmi. Ye' diché wa ye' tò ie' keraë ie'pa patkökmi ikä kì.

Skököl tò Moisés skä patkémine Egipto blú ska'

²Ñies Skököl tò iché Moisés a:

—Ye' dör Jehová. ³Mikä ye' e' kkayë' Abraham a ena Isaac a ena Jacob a, etä ye' iché tò ye' dör Skököl Diché Ta' Ýi Ulitane Tsata e'. Eré ye' kiè Jehová, e' kè yène ye' wa ie'pa a. ⁴Ye' tò ttè me' ie'pa a. Ye' tò iyë'at ie'pa a tò ká kiè Canaán e' merayö a' aleripa a. Eë ie'pa bak senuk wes o'ka ká es. ⁵Ïñe ye' wa ijcher tò ie'pa weirke siarë. Egiptowak tò ie'pa keke kaneblök darërëë kësik wa. E' kuekì ttè me'bak ye' tò ie'pa a e' wawekeyö ñe ta. ⁶E' kuekì be' yú ichök ie'pa a tò ye' dör Jehová. Egiptowak tò a' we'ikeke siarë kanè darërëë wa, e' kos ulä a a' yerattsa ye' tò. Ye' tò egiptowak we'ikeraë siarë ye' diché tajë e' wa. Es a' tsatkeräe ye' tò egiptowak ulä a. ⁷Ye' tò a' klö'weraë ye' ichapaie. Ye' döraë a' Kököl. A' wa ijcherdaë tò ye' dör Jehová. Ye' dör a' Kököl. A' wä ijcherdaë tò ye' tò a' yë'lur egiptowak bak a' we'ikök kanè darërëë wa e' ulä a. ⁸Ye' wä a' miraë ká muk ye' kablë' Abraham, Isaac ena Jacob e'pa a ee. Ká e' meraë ye' tò a' a. E' atdaë a' a. Ye' dör Jehová e' tò iché es.

⁹Etä Moisés tò ttè e' skä chéne Israel aleripa a. Eré ie'pa eriarke tajë kanè darërëe kuekì. E' kuekì ie'pa kè wä ittò iütène. ¹⁰Etä Jehová tò iché Moisés a:

¹¹—Be' yú ichök Egipto blú a tò kawö mú ye' ichapa a e' yöktsä Egipto a.

¹²Eré Moisés tò Jehová iüté:

—Israel aleripa kè tò ye' ttò iütè, etä ¿wes Egipto blú ye' ttò iütèmi? Ye' kè tto buaë.

¹³Etā Jehová tō Moisés ena Aarón e'pa patkēmi ichök Israel aleripa a ena Egipto blú a tō “Jehová tō sa' patké Israel aleripa yökulur Egipto.”

Moisés ena Aarón ditséwöpa

¹⁴I' dör Moisés ena Aarón ditséwö datse iyēpa wa:

Rubén e' dör Jacob alà wēm tsá, e' ala'r dör Hanoc, Falú, Hesrón ena Carmí. Ditséwöpa datse ie'pa wa e'pa kōs dör Rubén aleripa.

¹⁵Simeón ala'r wēpa dör Jemuel, Jamín, Óhad, Jaquín, Sóhar ena Saúl. Saúl mī dör cananeawak. Ditséwöpa datse ie'pa wa e'pa kōs dör Simeón aleripa.

¹⁶Leví sene' duas dōkā cien eyök kī dabom mañayök kī kul (137). I'pa dör ila'r wēpa ikibi ék dō ibata ék: Guersón, Quehat, ena Mera-rí. ¹⁷Guersón ala'r wēpa dör Libní ena Simí. ¹⁸Quehat sene' duas cien eyök kī dabom mañayök kī mañat (133). Ie' ala'r wēpa dör Amram, Ishar, Hebrón ena Usiel. ¹⁹Mera-rí ala'r wēpa dör Mahli ena Musí. Ditséwöpa datse ie'pa wa e'pa kōs dör Leví aleripa.

²⁰Amram sene'wā iyēchke kiè Jocabed e' tā. E' dör Moisés ena Aarón mī. Amram sene' duas cien eyök kī dabom mañayök kī kul (137).

²¹Ishar ala'r wēpa dör Coré, Néfeg ena Zicrí.

²²Uziel ala'r wēpa dör Misael, Elsaían ena Sitrí.

²³Aarón sene'wā alaköl kiè Elise-ba e' tā. E' dör Aminadab alà busi

ena Nahasón kutà. E' ala'r wēpa kiè Nadab, Abihú, Eleasar ena Itamar.

²⁴Coré ala'r wēpa dör Asur, Elcaná ena Abiasaf. Ditséwöpa datse ie'pa wa e'pa kōs dör Coré aleripa.

²⁵Eleasar dör Aarón alà, e' sene'wā Futiel alà busi tā. E' alà kune kiè Finees. E'pa kōs datse iyé tsá kiè Leví e' wa.

²⁶Aarón ena Moisés e'pa patkē' Jehová tō Israel aleripa yökulur Egipto a dapaulekā wes ñippök-wakpa taiē e' dapa'ù es. ²⁷Aarón ena Moisés e'pa ut Egipto blú tā as ie' tō kawō mù ie'pa a Israel aleripa yöktsarak Egipto a.

Aarón tté Egipto blú tā Moisés skéie

²⁸Mik Jehová tté Moisés tso' Egipto e' tā, ²⁹etā ichéitō iā:

—Ye' dör Jehová. Ì kōs chekeyö be' a e' skà chóné Egipto blú a.

³⁰Eré Moisés iüté:

—A Jehová, ye' kè tto buaë, etā žwes Egipto blú ye' ttò iütèmi?

7 ¹Etā Jehová tō iché Moisés a: —Ye' ttò ttsó. Be' èl Aarón ttöraé Egipto blú tā be' skéie wes ye' ttekölpa ttöke ye' skéie es. ²Ì kōs chekeyö be' a, e' cherane be' tō Aarón a tā Aarón tō icherane Egipto blú a as ie' tō kawō mù a' a Israel aleripa yöktsarak Egipto a. ³Eré ye' tō Egipto blú er daré'wēkewā. Ì kè or yi a ese wērayö Egipto ye' diché taiē e' wa kkachöie. Ie'pa wökrardawā isaük. ⁴Egipto blú kè tō a' ttò iütēpa. Eré ye' tō egiptowak we'ikeraé siarē

ye' diché taijē e' wa. Es ye' tō Israel aleripa yeralur. Ie'pa dōr ye' a wēs ñippōkwakpa tso' taijē es. Ie'pa dōr ye' icha. ⁵Egiptowak we'ikéyō siarē ye' diché taijē wa ñies Israel aleripa yéttsayō e' ukuōkī tā egip-towak tō isueraē tō mokijē ye' dōr Jehová.

⁶Moisés ena Aarón e'pa tō iwanewé wēs Jehová tō iché ie'pa a es. ⁷Mik ie'pa tté Egipto blú tā etā Moisés kī duas tso' dabom paryök (80). Aarón kī duas tso' dabom paryök kī mañat (83).

Aarón shko kéli yōnane tkabèie

⁸Jehová tō iché Moisés ena Aarón a:

⁹—Egipto blu' tō a' a iché: 'Ì kè or yi a ese ú', e' tā ichó Aarón a tō ishko kéli iuyómi iski as iyōnar tkabèie Egipto blú wörki.

¹⁰Etā Moisés ena Aarón mía Egipto blú ska' etā ie'pa iwé wēs Jehová tō iché ie'pa a es. Aarón tō ishko kéli uyémi iski Egipto blú ena ikueblupa e'pa wörki tā iyōnane tkabèie. ¹¹Etā Egipto blú tō wēpa wā íyi jcher taijē ena ie'pa awápa esepa tsuk patké. Ie'pa tō ikanewé ñi suē isiwé wa. ¹²Ie'pa shko kéli uyémi iski ñies tā iyōnane ñies tkabèie. Erē Aarón shko kéli tō Egipto shko kéli katéwarak seraa. ¹³Erē Egipto blú er téwā darērēe wēs Jehová tō iyē' es. Ie' kè wā ie'pa ttō iütēne yēs.

Jehová tō di' yuée péie

¹⁴E' ukuōkī tā Jehová tō iché Moisés a:


—Egipto blu' er téwā darērēe. Kè ie' éna Israel aleripa akmine. ¹⁵Bule bla'mi mik ie' mía di'kka, etā be' yú ttök ie' tā. Ie' panú di'kka. Shko kéli yōnane tkabèie e' kéli tsúmi. ¹⁶Ie' a ichó: 'Jehová dōr hebreowak Kéköl, e' tō ye' patké ichók be' a tō ie' ala'r ómine as imi'rak ie' kikōkka ká wé kī kè yi serku' ee. Ikké tā kam bö ie' ttō iütō yēs.' ¹⁷E' kuēkī Jehová tō ye' patké ichök be' a: 'Ire' bö isueraē tō mokī ie' dōr Jehová. Mik ye' tō di' ppé shko kéli a'tser ye' wā e' wa, etā di' miaraē pé wōchka. ¹⁸Nima duölurdaē. Di' alaburdakā suluē. Egiptowak kè a di' e' yanuk, taijē ie'pa dako'wekaraētō.'

¹⁹Ñies Jehová tō iché Moisés a:

—Ichó Aarón a tō ie' shko kéli klō'ú tā ikōkā di' kos tso' ie'pa wā yè ese tsakā. Di'la, batsóri, di' wöblē, di' bló tso' ese kos tsakā ie' ulà kōkā as imi'a péie. iEs imiaraē pé wōchka di' bló ulitane yöule kal wa ö ák wa ese a!

²⁰Etā Moisés ena Aarón iwakanewé wēs Jehová tō iché ie'pa a es. Aarón tō ishko kéli kékā e' wa di' ppéitō Egipto blú ena ikueblupa wōshaē. Etā di' kos ekké mía péie. ²¹Nima kos duolur. Di' alane-wā suluē kè yar egiptowak a. iKá wa'ñe di' mía pé wōchka!

²²Erē egiptowak awápa tō iwé ñies isiwé wa. E' kuēkī Egipto blú er téwā wēs Jehová tō iyē' es. Ie' kè wā Moisés ena Aarón ttō iütēne yēs. ²³Ie' míane iu a. Kè tkine íyi kos kī. ²⁴Egiptowak kos kè a di' yar e' kuēkī ie'pa tō di'



Bukuë' alõneká tajë Egipto. (Éxodo 7.25-8.15)

wõblë bié di' kkõmik di' manene yottsaië.

**Jehová tō egiptowak
we'iké siarë bukuë' wa**

25 Jehová tō di' kiè Nilo e'
suluo'wā e' kī ká de kul,

8 1 etā ie' tō iché Moisés a:
—Be' yú Egipto blú ska' tã
ichó iā: 'Jehová tō ye' patké ichök
be' ā i' es: Ye' ichapa ómine as imi'
ye' dalõiök. 2 Kè be' tō ie'pa èmi, e'
tã ye' tō bukuë' alõwëraká tajë a'
ká kī a' we'ikoie. 3 Di' Nilo ā bukuë'
alõrdaë tajë shutëë. E' e' yõralur di'
ā mirawā be' u ā. Idõrawā wëshkë
wé be' kapõke ee, be' kã kī. Nies
idõrawā be' kuëblupa u ā ena be'
yamipa kōs e'pa u ā. Ie' tiurawā wé
a' ulõke ese ā ena wé a' pan wõtuö-
ke ese kōs ā. 4 Bukuë' urdaká be' kī
ena be' kuëblupa kī ena kōs be' ká
wakpa tso' e'pa kī.'

5 Etā Jehová tō Moisés ā iché:

—Ichó Aarón ā tō ie' ulà ena ie'
shko kéli kókā di' kibi ena di' tsi-
tsir ena batsõri kōs ekkë tsākā as
bukuë' dõkã di' ā Egipto kōs wã
iõkkã.

6 Aarón tō ishko kéli kékã Egipto
di' kōs tsākã. Etã Egipto ká wa'ñe
bukuë' alõneká tajë. 7 Erë egipto-
wak awápa tō iwé ñi suë isiwé wa.
Ie'pa tō bukuë' alõwékã ñies. 8 E'
ukuõkī tã Egipto blú tō Moisés ena
Aarón e'pa tsuk patké tã ichéitõ
ie'pa ā:

—A' tō ikió Jehová ā tō bukuë'
yólur ye' kī ena ye' ká wakpa kōs
kī ñies. E' yéluritõ etã ye' tō a'
yamipa émimi as imi' iyiwak ña'uk
Jehová dalõioie.

9 Etã Moisés tō Egipto blú iuté:
—Ichó ña tō ¿Mik be' kī ikiane
tō ye' tō ikiè Jehová ā be' kī ena
be' kuëblupa kī ena be' ká wakpa
kōs kī as bukuë' kè tō a' tsiriwëiã tã
iatdaë di' è ā?

¹⁰Egipto blú iüté:

—Ikió Jehovah á bule.

Etá Moisés tö iché ie' a:

—E' wà tköraë wes be' kî ikiane es as be' wa ijcher tö kè yi dör wes sa' Këköl Jehovah es. ¹¹Bukuë' e' yölurdane be' u á atdaë di' è á. Kè itö be' tsiriwepaia. Nies be' kuëblupa ena be' ká wakpa kos kè tsiriwepaiaitö.

¹²Etá Moisés ena Aarón e' yéttsa Egipto blú wöwa. E' ukuökî tá Moisés ikié Jehovah á tö bukuë' patkè'bitu Egipto blú kî e' tré'úmi ie' yöki. ¹³Etá Jehovah tö iwakanewé wes Moisés tö ikié ia es. Bukuë' tso' egiptowak u á iupamik u'rkî e' kos duolur. ¹⁴Egiptowak tö bukuë' nu kos shtë dapa'wé taië. E' nu alabuneká suluë ká e' kos á. ¹⁵Erë mik Egipto blú tö isuë tö ie' tsatkéne bukuë' ulá á, etá ier téwane darërëë wes Jehovah tö iyë' es. Kè ie' wá Moisés ena Aarón ttö iütëne.

Mulú'shwak patké taië Jehová tö ie'pa kî

¹⁶E' ukuökî tá Jehovah tö iché Moisés á:

—Ichó Aarón á tö ie' shko kéli kóka siwá' kî e' wa íyök po ppó as imi'á mulú'shwakie Egipto wa'ñe.

¹⁷Etá iwakanewérakitö es. Aarón tö shko kéli kéka tá íyök po ppéitö iwa etá íyök po tso' Egipto wa'ñe e' míá mulú'shwakie e' iëneká se' kî nies iyiwak kos kî. ¹⁸Egiptowak awápa ima'wé mulú'shwak alöykká isiwé wa, erë kè iwá yöne ie'pa á. E' dalewa mulú'shwak iëneká taië ie'pa kî nies iyiwak kî. ¹⁹Etá iwépa tö iché Egipto blú á:

—I' dör Skëköl kanè moki!

Erë ie' er téwa darërë wes Jehovah tö iyë' es. Kè ie' wá ie'pa ttö iütëne.

Ó iéka taië Skëköl tö ie'pa kî

²⁰E' ukuökî tá, Jehovah tö iché Moisés á:

—Bule bla'mi Egipto blú mi'ke di'kka, e' kuëki be' e' kóka bla'mi tá be' yú ñi kukwá ita. Ichó ie' á: 'Jehová tö ye' patké ichök be' á i' es: Ye' ichapa ómine as imi' ye' kikökka. ²¹Kè be' tö ie'pa èmine, e' tá ye' tö ó taië patkeraë be' kî ena be' kuëblupa kî ena kos be' ká wakpa tso' e'pa kî. Ó iërdaká egiptowak u kos ekké kî dò íyök kî. ²²Mik e' wá de a' kî, etá ó patkeraëyö a' è kî. Wé ye' ichapa serke Gosen ee ó kè suepasö yës. Es be' éna iarmi tö moki ye' dör Jehovah, e' durse ká i' kî. ²³Be' ká wakpa e'pa è we'ikeraë ie' tö. Erë ye' ichapa kè we'ikepayö. E' wá tköraë bule.'

²⁴Es Jehovah tö iwakanewé. Ó dettsa chkaie Egipto blú u á ena ikueblupa u á nies Egipto wa'ñe e' á. Ó tö Egipto ká kos klö'wéwá se, sulu'wéwá yës.

²⁵Etá Egipto blú tö Moisés ena Aarón tsuk patké tá ichéitö ie'pa á:

—A' yú, e'ma a' Këköl á iyiwak ña'uk. Erë kè a' e' yökulur Egipto á.

²⁶Moisés tö iüté:

—Kè e' dör buaë es. Sa' iyiwak ña'weke sa' tö sa' Këköl Jehovah e' á, e' dör iyiwak dalöieke a' tö skëkölie ese. A' tö sa' suë iyiwak ese ña'uk, e' tá a' tö sa' ttëwami ák wa. ²⁷Sa' kawötá shkök dò ká mañat dò

wé kè yi serku' ese ska'. Ee sa' tò iyiwak ña'wëke sa' Kèköl Jehová a wes kawö méatitö sa' a es.

²⁸Egipto blú tò iché:

—A' kè mîne kamië shutë, e' ta ye' tò a' emimirak wé kè yi serku' ese ska', iyiwak ña'uk a' Kèköl Jehová e' a. A' Kèköl Jehová a ikió ye' ki.

²⁹Moisés tò iüté:

—Mik ye' e' yéttsa íe, etä ye' mía Jehová a ikiök be' ki as ó pormi be' yökí ena be' kueblupa yökí ena be' ká wakpa kos e'pa yökí. Erë kè be' tò sa' kitö'ukia. Kè be' tò Israel aleripa wöklö'uk as imi' iyiwak ña'uk Jehová a.

³⁰Mik Moisés e' yéttsa Egipto blú wöwa, etä ie' ikié Jehová a. ³¹Etä Jehová tò iwé wes Moisés tò ikié ie' a es. Es ó po'wémíitö Egipto blú yökí ena ikuēblupa yökí ena iká wakpa kos e'pa yökí. Kè ó ateia etkla wé'ia. ³²Erë Egipto blú er skà téwane darërëë. Kè ie' wa Israel aleripa anemi.

Jehová tò egiptowak iyiwak ttélur

9 ¹E' ukuökí ta Jehová tò iché Moisés a:

—Be' yú ttök Egipto blú ta, ta ichó ia: 'Jehová dör hebreowak Kèköl, e' tò ichè i' es: Ye' ichapa ómine as imi' ye' kikökka. ²Be' kè tò ie'pa èmine, be' tò ie'pa wöklö'wëkeia, ³e' ta ye' tò duè meqaraë be' iyiwak kos e' ki ye' diché taië wa. Be' kabaio, be' burro, be' kameio, be' baka ena be' obeja ekké kos duölurdaë. ⁴Erë Israel aleripa

iyiwak ulitane kè duöpalur etö wé'ia. Es ye' tò ikkacheraë tò ie'pa dör ye' ichapa.'

⁵Etä Jehová tò ikéwö méwa i' es:

—E' kos weraëyö bule.

⁶Bule es ta Jehová tò iwé. Egiptowak iyiwak kos e' duolur. Erë Israel aleripa icha kè du'wa etö wé'ia. ⁷Egipto blú tò Israel aleripa icha sauk patké etä ie' isué tò moki Israel aleripa icha kè du'wa etö wé'ia. Erë ie' er kitéwa darërëë. Kè ie' wa Israel aleripa a kawö mène as imi'rak.

Jehová tò duè méka egiptowak ki skuëkie

⁸E' ukuökí ta Jehová tò iché Moisés ena Aarón a:

—Muluchka tso' bö'kkö a e' klö'ú ta as Moisés tò iuyò siwa' ki Egipto blú wörki. ⁹Muluchka e' po ardaë Egipto kos e' ki. E' tskirdane ie'pa ki skuëkie nies iyyiwak ki.

¹⁰Etä Moisés ena Aarón muluchka klö'wé bö'kkö a ta imía Egipto blú ska' ta e' wörki Moisés tò muluchka uyé siwa' ki. Etä egiptowak mik imoneka skuëkie. Nies iyyiwak kos mik imoneka skuëkie. ¹¹Egipto awápa ki skuëk tskineka taië wes imalepa es, e' kuëki ie'pa kè de' Moisés wörki. ¹²Erë Jehová tò Egipto blú er daré'wéwa as kè itö Moisés ena Aarón ttö iütö wes ie' tò iyé' es.

Mò wösi sēsēë ese patké Jehová tò egiptowak ki

¹³E' ukuökí ta Jehová tò iché Moisés a:

—Be' e' kókā bule bla'mi eṭā be' yú Egipto blú ā ichök: 'Jehová dör hebreowak Këkök, e' tō ichè be' ā i' es: Ye' ichapa ómi ās imi'rak ye' kíkōkka. ¹⁴Kè be' wā ye' tto iütēne i' tā, e' tā ye' tō íyi sulusi kōs patkeraë be' kī ena be' kueblupa kī ena a' wakpa kōs e' kī. Es be' wā ijcherdaë tō kè yi ku' ye' tsata ká wa'ñe. ¹⁵Ye' mú kī ikiane, e'ma ye' tō íyi sulusi me'kābak be' kī ena be' yamipa ulitane kī a' eukwa ká i' kī. ¹⁶Erë ye' wā be' tso'ia tse'ka ās be' tō ye' diché taië e' saù, ñies ās yi dör ye' e' tté pakar ká wa'ñe. ¹⁷Erë be' er dör suluë kekraë. Kè bō ye' ichapa Israel aleripa émi. ¹⁸Bule ikkè mò wōsi seseë ese patkeraëyō a' kī taië. E' dardaë taië a' kī tkōka kenet idarke Egipto e' tsata. ¹⁹Mò wōsi ardaë e' tō a' tso' u'rkī ena a' iyiwak kōs tso' kañikā e' ttēmīlur se. E' kuekī a' iyiwak ena ì kōs tso' a' wā kañikā e' blök patkó u dikīā ās itsatkër.'

²⁰Eṭā Egipto blú kueblupa welepa suane Jehová tto yöki. E'pa tō iyyiwak blé, ñies ikanè méso-pa blé u dikīā. ²¹Erë imalepa kè wā Jehová tto klōne, e'pa tō icha méat u'rkī. ²²Eṭā Jehová tō Moisés ā iché:

—Be' ulà kókā siwā' kī ās mò wōsi seseë ese dar taië Egipto kōs ā. E' ardaë ie'pa kī ena iyyiwak kī ñies idaliwō tso'rak iwā e' kī.

²³Mik Moisés tō shko kéli kéka siwā' kī, eṭā Jehová tō alá bla'wé taië wōñawéitō taië dōttsā íyök kī eṭā mò wōsi seseë ákwōie e' patkéitō Egipto kōs ā. ²⁴Es Jeho-

vá tō mò wōsi seseë ese patké taië Egipto ká wa'ñe ā. Eṭā mò wōsi ese darke taië ena ká wōñarke taië, kè iwöklōrta'. Kè yi wā e' suule yēs Egipto. ²⁵Eṭā mò wōsi e' biteshka taië ì kōs tso' ká áie a' e' kī, se' kī ena iyiwak kī ñies. Dalí kuá kōs péluritō sulu'wéluritō. Kal tso' ká wa'ñe e' ulà jchërolone. ²⁶Erë ká kiè Gosen, wé Israel aleripa serke, e' ā mò wōsi kè dane yēs.

²⁷Eṭā Egipto blú tō Moisés ena Aarón tsuk patké tā ichéitō ia:

—Ire' yō isué tō ye' e' wamblé suluë. Jehová e' tté dör mokië. Eṭā ye' ena ye' ká wakpa sa' iane iwīie. ²⁸Taië alá blarke ñies mò wōsi darke taië e' kè dalé'ttsēneia sa' ā. Jehová ā ikió tō iwöklō'üne, e' tā ye' tō a' ekemi. Kè yō a' wöklō'wēia.

²⁹Eṭā Moisés tō iüté:

—Ye' e' yéttsā ká i' ā tā bet ye' ikieke Jehová ā, eṭā mò wōsi ena alá wōñarke kōs e' wöklōrdawā ās be' wā ijcher tō Jehová dör ká wa'ñe e' wák. ³⁰Erë ye' wā ijcher buaë tō be' ena be' kueblupa kam tō Sa' Këkök Jehová e' dalōiò.

³¹Eṭā daliwō kiè lino e' tso' wörkuaie ena cebada e' wō ta'tke, e' kuekī iweinewa se. ³²Erë daliwō kiè trigo ena centeno, kè e' dē' wēs kam iwörkua bur e' kuekī.

³³Mik Moisés e' yéttsā ká e' ā míā bānet, eṭā eē ie' tō ikié Jehová ā. Eṭā bet tā mò wōsi kè daneia ñies ká kè wōñaneia. Kalī taië e' kè yēneia. ³⁴Mik Egipto blú tō isué tō kalī kè yërku'ia, mò wōsi kè darku'ia ena alá kè blarku'ia,

et̃a ie' e' wambléne suluë. Kè ie' è er darè'newā ñies ikuëblupa. ³⁵Es Egipto blú er téwā darèrèë. Kè iwā Israel aleripa a kawō mène as imi'yal wes Jehovah tō iyè'ia Moisés ttè wa es.

**Jehová tō ditski
patké taië Egipto**

10 ¹E' ukuöki t̃a Jehovah tō Moisés a iché:

—Be' yúne Egipto blú ska'. Ye' tō ie' ena ikuëblupa er téwā darèrèë as ie'pa tō isaù tō ye' diché taië, e' wa ì kè or yi a ese wè ye' tō taië.

²Ye' tō ie'pa er téwā darèrèë as be' tō ipakò be' ala'r a ena be' talapa a tō wes egiptowak we'ikéyö ñies wes ì kè or yi a ese wéyö taië ie'pa wörki. Es a' ulitane wā ijcher tō ye' dör Jehovah.

³Et̃a Moisés ena Aarón míyal Egipto blú ska' et̃a ichéitö ia:

—Jehová dör hebreowak Kèköl, e' tō ichè i' es: “¿Mik be' tō ye' ttò dalösewemirö? Ye' ichapa ómi as imi' ye' kikökkā. ⁴Kè be' tō ie'pa èmi bule, e' t̃a ditski patkeraëyö a' ká k̃i. ⁵Ditski tō a' ká wā iera-wā taië, kè a' iyök ulat wènea. A' daliwö bata méat mò wösi tō e' kos katerawaitö yës. Ñies kal ulitane katerawaitö seraā. ⁶Ñies ditski dōrawā taië be' u kos a ena be' kuëblupa u a ena egiptowak kos u a. Íyi i'se kè s̃uule a' yépa bak ká iaiaë e'pa wā ie'pa tsá dè'bitu ká i' k̃i dò ikkè t̃a!”

Moisés tté one t̃a ie' e' wötrée t̃a imía. ⁷E' bet t̃a Egipto blú kuëblupa tō iché iblú a:

—¿Mik t̃a wëm e' kè tō se' we'ikèia? A blu', ie'pa ómi ie'pa Kèköl dör Jehovah, e' kikökkā. A blu', ¿be' kè wā isune tō se' ká sulunewatke seraā?

⁸Et̃a Egipto blú tō Moisés ena Aarón tsuk patkéne et̃a ichéitö ia:

—A' yúshka Jehovah dör a' Kèköl, e' kikökkā. Erè kewèie a' tō ye' a ichö tō ¿a' wénepa è mi'ke?

⁹Moisés tō iutè:

—Sa' kawötā shkökmi sekka. Sa' kawō taië tkó'uke Jehovah a. E' kuëk̃i sa' ala'r ena sa' kékèpa, e'pa kos kawötā shkökmi. Ñies sa' obeja kos ena sa' baka kos e' mi'ke sa' wā.

¹⁰Et̃a Egipto blú tō iché ia:

—iIwènewā wöshak tō a' erbiköke suluë ye' k̃i! ¿Ima a' erbikö tō Jehovah tō a' k̃imèmi as ye' tō a' òmi a' alakölpaë ena a' ala'rè? ¹¹Kè iwamblërpa es. A' wèpa kibineone esepa è yú Jehovah kikökkā es a' k̃i ikiane e' kuëk̃i.

Et̃a Egipto blú tō ie'pa tsukmi ké ie' yök̃i. ¹²Erè Jehovah tō iché Moisés a:

—Be' ulà kókā Egipto k̃i as ditski bitu Egipto kos wā iökka ñies dali-kua bata méat mò wösi tō e' kos katökwa.

¹³Et̃a Moisés tō ishko kéli kéka Egipto k̃i et̃a Jehovah tō siwā' patké-bitu diwö tskirke e' kke Egipto kos k̃i ñië nañeë. Bule es bla'mi t̃a siwā' wā ditski debitu. ¹⁴Ditski tō Egipto ká kos e' wā iéwā taië. Ekkè kè s̃uule yi wā ká iaiaë es kè yi tō isupeaiane. ¹⁵Es ditski dapanekā ká kos ekkè k̃i. Kè a' iyök ulat t̃a'ia. Dalì kuá ena kalwö e' kos bata méat mò wösi tō



*Ditski alõnekā taië Egip-
to. (Éxodo 10.1-20)*

e' katélur ditski tō yēs. Egipto kōs a kākō kōs kal kō kōs e' kē ateia yēs.

¹⁶E' bet tã Egipto blú tō Moisés ena Aarón e'pa tsuk patké tã iché ia: —Ye' e' wamblé sulu a' Këköl dör Jehová e' kī nīes a' kī. ¹⁷Ye' kkōchò a' a' i'ñe è tō a' tō e' olo'yó ye' kī. Ikió a' Këköl dör Jehová e' a' ye' kī tō ditski è trë'úlur ye' kī aš kē sa' duölur.

¹⁸Moisés e' yéttsa Egipto blú u a tã bet ikiéitō Jehová a. ¹⁹Etã Jehová tō siwã' e' wótréene tsikka darërë e' wã ditski mítser anene dayë kiè Dayë Mat, e' kī. Etã ditski kē atë yēs Egipto. ²⁰Erë Jehová tō Egipto blú er sulu téwane darërë. Ie' kē wã Israel aleripa a kawō mène aš imi'rak.

Jehová tō kã ttsettseë patké Egipto kī

²¹Etã Jehová tō Moisés a iché: —Be' ulã kókã siwã' kī aš kã ttserwã ttsettseë shuteë.

²²Etã Moisés ulã kékã etã kã ttsenewã miã ttsettseë Egipto kã wa'ñe kī dökã kã mañat. ²³Kē yi wã iyami serke tsinet e' sune yēs. Kē yi a e' yënuksã wé itkër ee dökã kã mañat. Erë Israel aleripa u a, ee je' kã olo tso' dalölö.

²⁴Etã Egipto blú tō Moisés tsuk patké tã iché ia:

—A' yúshka Jehová kíkōkka. A' ala'r kōs tsúmi. Erë a' obeja ena a' baka e' kōs múat.

²⁵Etã Moisés tō iüté:

—Au. Be' kawōtã kawō muk sa' a sa' iyiwak tsukmi ña'wè sa' Këköl dör Jehová e' a idalöioie. ²⁶E' kīie tã sa' icha kōs, e' michoë sa' wakpa wã. Sa' iyiwak shushteke sa' tō ña'wè sa' Këköl Jehová a ikikokaie. Kãm sa' dõmi ee etã kē sa' wã ijcher iyiwak isie ètō kiane sa' kī ña'wè Jehová a. E' kuëkī kē sa' tō sa' iyiwak mepaat yēs.

²⁷Etã Jehová tō Egipto blú er sulu téwã darërë. E' kuëkī ie' kē wã kawō mène Israel aleripa a aš imi'rak. ²⁸E' kīie tã Egipto blú tō iché Moisés a:

—Be' e' yóttsa ië. Be' e' kkõ'nú ye' yöki. Be' dene ye' sauk, e' tã be' duörawã.

²⁹Etã Moisés tō iüté:

—Buaë bö iché es. Kē ye' dë'iane be' sauk.

Ala'r wëpa kibi esepa duöralur e' biyöché Moisés tō

11 ¹E' ukuökī tã Jehová tō iché Moisés a:

—Ye' tō Egipto blú ena egiptowak ulitane e' bata we'ikekeia. E' ukuökī tã Egipto blú tō a' erami, e' kīie ie' wák tō a' ulitane uyerattsa da'ie ikã kī. ²Etã ichó Israel aleripa ulitane a, wëpa ena alakölpa tō íyi yöule orochka wa ena inukölchka wa, ese kak kió egiptowak serke ie'pa pamik esepa a.

³Etá Jehová tò egiptowak ké Israel aleripa dalöiök taië. Egipto blú kueblupa ena egiptowak ulitane e'pa tò iklò'wé tò Moisés dör kékèpa taië.

⁴Etá Moisés tò iché Egipto blú a: —Jehová tò ichè i' es: Ká shabòts nañewe ye' mi'ke Egipto kos a.

⁵Ala'r wèpa kibipa e' kos duöralur. Egipto blú tso' s'wökirie e' alà wèm kibi duörawa, ñies egiptowak malepa icha kos dò s'siarèpa tso'rak iwà iyiwö woie esepa icha duöralur ñies. Ñies iyiwak uru alà wè'ñe kibi ese kos duöralur. ⁶Sulitane iuräe taië Egipto kos a. Kè ese ttsèule yi wà es, ñies kè yi tò ese ttsepaia es. ⁷Erè Israel aleripa shuà kè chichi isie arpa yès se' wöa ena iyiwak wöa. Es a' wà ijcherdaë tò ye' dör Jehová e' tso' Israel aleripa kìmuk, erè egiptowak we'ikök ye' tso'.

⁸Etá Moisés tò ikí ché ia:

—Be' kueblupa kos döraë ye' ska', etá ie'pa e' tkörawa kuchè kị ye' wörkị tã ikköchörorak ye' a: 'Be' yúshka. Be' yamipa tso' kos be' tã e'pa tsúmirak ñies.'

Etá Moisés ulune taië e' yéttsa Egipto blú wörkị. ⁹E' ukuökị tã Jehová tò iché Moisés a:

—Egipto blu' kè tò a' tò iutepa as ye' tò i kè or yi a ese kị ù taië Egipto.

¹⁰Iyi ekkè kos wé Moisés ena Aarón tò Egipto blú wörkị, erè Jehová tò ie' er darè'wéwá as kè itò ittò iutò. E' kuekị ie' kè wà kawö mène Israel aleripa a as imi'yal.

Israel aleripa tsatkène e' kèwö

12 ¹Jehová tò iché Moisés ena Aarón tso' Egipto e'pa a:

²“Si' i' döraë a' a duas si' tsawe kekraë. ³Israel aleripa ulitane a ichö: ‘Si' i' e' diwö dabop (10) etá u bitkue ekkè wakpa tò obeja ö chibo ese wè'ñe pupula yuló etò katè ila'r tã. ⁴U wakpa welepa kè dör taië, kè a chké ekkè katarwa, e' tã ie'pa tò iyamipa tso' iupamik esepa kió chkök ie'pa tã ñita kos iwakpa döka ekkè ena kos ie'pa a ikatar ekkè. ⁵Obeja ö chibo wè'ñe bua'buwa, kè kị ì sulu ku' kị duas tso' ek ese yuló etò. ⁶E' bló. Si' i' e' diwö de dabop kị tkèl (14) e' tsálij etá a' wà iyiwak tso' blèule ese ttó u a u a. ⁷E' ukuökị tã a' tò iklò'ú tã u wé a a' tò ikateke, e' wékkö katke patiúka a' tò ipé wa. ⁸Ká e' nañewe chké e' kató katuule bö' a ár bacha'bacha tã ñies pan kè yöule iwölöwoka wa, ese tã. ⁹Kè ikatar aki ena paliule elkela wè'ia. Ichkà kos, iwökir, ikla'tska, ena inattse e' kos kawöta kakuéwá bö' a. ¹⁰Kè a' tò ibata mukat dö bule es. Ibata ateia, e' tã ina'ülör bö' a. ¹¹Mik a' chköketke etá a' e' paió, a' klökkuó ió, a' shko kéli klö'ú. Ye' dör Jehová e' tò a' tsatkeke e' kèwö tkö'weke a' tò, e' kuekị a' chkö bet.

¹²“I'ñe nañewe ye' tköraë Egipto ká kos a egiptowak ala'r tsá wèm esepa ttökulur. Ñies ie'pa iyiwak ala'rla tsá dör wè'ñe e' kos tteralur ye' tò. Es kékölpa kos tso' egiptowak wà dalöie e' we'ikeraë ye' tò taië. Ye' wák dör Jehová e' tò ichè es. ¹³U kos a wé a' tso' e' wékkö ta'oule ipamik iyiwak pé wa e' dör a' wakpa a ikkachoie. Mik ye' tò pé e' sué, etá ye' damitkö u e' ttómik. Mik ye' tso' egiptowak we'ikök siarè, etá e' kè dòpa a' ska'.

14“ ‘A' k̄awōt̄a k̄awō e' tkō'uk. A' k̄awōt̄a itkō'uk k̄ekraē duas bit ekkē ye' dōr Jehová e' dalōioie. 15K̄á dōk̄a k̄á kul e' shuā a' k̄ē k̄awō t̄a' pan yōule iwōlōwōk̄a wa ese ñuk. E' kuek̄i k̄awō tkō'weke e' diwō tsá et̄a pan wōlōwōk̄a k̄os ese tulótt̄sa a' u a. Yi tō pan yōule iwōlōwōk̄a wa ese ñē k̄á kul e' shuā, e' t̄a ese wák k̄ē k̄awō t̄a' senuk Israel aleripa shuā. 16K̄awō tkō'weke e' tsá diwō et̄a a' e' dapa'úka ek ts̄in̄i òme ye' dalōioie. Ñies e' diwō bata t̄a a' e' dapa'úkane. K̄á tsá ena ibata, e' diwō k̄ē a' k̄awō t̄a' kanēblōk yēs, ù è alirmi a' a. 17K̄awō kiē Pan K̄ē Yōule Iwōlōwōk̄a Wa, e' k̄ewō tkō'uk a' k̄awōt̄a. E' è k̄ewō wa ye' tō a' yeratt̄sa Egipto a seraa. E' kuek̄i a' k̄awōt̄a e' k̄ewō tkō'uk. E' k̄ewō tkō'weraē a' tō k̄ekraē. E' meneat dalōiē a' a ena a' ditsēwōpa dat̄se a' itōk̄i aishkuō t̄a e'pa k̄os a. 18Si' i' dōr duas si' tsá, e' diwō dabom eyōk k̄i k̄ēl (14) e' tsáli a' k̄ē k̄awō t̄a' pan yōule iwōlōwōk̄a wa ese ñuk dō si' i' k̄i diwō de dabom bōyōk k̄i et (21), e' tsáli et̄a a' tō in̄emine. 19K̄awō kul e' shuā a' k̄ē k̄awō t̄a' pan wōlōwōk̄a seuk u a. Yi tō pan yōule iwōlōwōk̄a wa ese ñē k̄á kul e' shuā, k̄á kuā'k̄i wakpa ò Israel aleripa, e' t̄a ese wák k̄ē k̄awō t̄a' senuk Israel aleripa shuā. 20E' kuek̄i ì k̄os yōule pan wōlōwōk̄a wa, ese k̄ē ñar yēs. Wé a' tso'rō eē t̄a a' k̄ē k̄awō t̄a' pan yōule iwōlōwōk̄a wa, ese ñuk.’ ”

21 Et̄a Moisés tō Israel aleripa kueblupa dapa'wé t̄a ichéitō iā: “A'

wakpa bil ekkē yú obeja ò chibo klō'uk etō etō, tsúmi a' u a a' yamipa a. Ittōwā, Jehová tō se' tsatkere i'ñe, e' k̄ewō tkō'woie. 22Ipé klō'ú tka' a. Et̄a k̄akō kiē hisopo e' ulā klō'ú eyōk, e' nuúka pé wa, e' wa u wékkō k̄atke patiúka. K̄ē a' e' yōkulur u a kam k̄á ñir e' yōk̄i. 23Mik Jehová tkōmi egip-towak ttōkulur, et̄a ie' tō u wékkō e' k̄atke suē iaulek̄a pé wa et̄a ie' dami-tkō u e' ttōmik. Es Jehová k̄ē k̄awō mepa ibiyōchōkwak tō s'ttekelur e' a a' ttōkulur weshke. 24A' k̄awōt̄a ttē i' k̄os dalōiōk k̄ekraē, ñies a' aleripa k̄os dat̄se a' itōk̄i e'pa k̄awōt̄a idalōiōk. 25Mik a' demi k̄á yé' Jehová tō tō imeraē se' a eē, et̄a a' k̄awōt̄a k̄awō i' tkō'uk. 26Mik a' ala'r tō ichaké a' a: ‘¿Iōk se' tō k̄awō i' tkō'weke?’, 27et̄a a' k̄awōt̄a iūtōk: ‘Iyiwak i' ttekesō Jehová dalōioie ie' tō se' tsatkē' egiptowak ulā a e' kuek̄i. Mik ie' bakmi egiptowak ttōkulur, et̄a ie' bakmi se' Israel aleripa u ttōmik k̄ē dē'wā. Es ie' tō se' yamipa tsatkē'lor.’ ”


Et̄a Israel aleripa e' tkélur kuchē k̄i Jehová dalōioie. 28E' ukuōk̄i t̄a ie'pa míā iwakanewé wes Jehová tō iché Moisés ena Aarón a es.

Ala'r wēpa kibipa esepa duolur

29K̄á shābōts Jehová tō egiptowak ala'r wēpa kibipa esepa k̄os ttélur seraa. Egipto blú tso' s'wōkirie e' alà wēm kibi e' duowa. Egiptowak malepa icha k̄os dō s'tso' wōtēule s'wōto wé a e'pa ala'r wēpa kibipa e'pa duolur ñies. Ñies iyiwak alà wēñe kibi e' k̄os duolur. 30E' nañewe Egipto blú ena ikuēblupa ñies egiptowak k̄os e'pa e' kékarak seraa



*Jehová tō Israel aleripa patké ie'pa wékkō kàtke
patiukkā pé wa. (Éxodo 12.22)*



Israel aleripa tö egiptowak íyi bua'buá ese kôs tsémi. (Éxodo 12.36)

íuk ème. Kè u ku' yès e' kè a s'nu ku'.

³¹E' nañewe Egipto blú tö Moisés ena Aarón tsuk patké tã ichéitö iã:

—A' yúshka a' yamipaë. A' e' skó bānet sa' yōkī. A' yúshka Jehová kīkōkka wēs a' tö iyē' kuaë es.

³²Iyiwak kôs tsúmi wēs a' kī ikiane es. A' yúshka sa' yōkī. Nies a' kkōchó Jehová a' as ie' ye' kīmù.

³³Etã egiptowak tö iché Israel aleripa a: “A' yúshka betbet sa' yōkī. A' kè mīne e' tã sa' ulitane duōralur.”

³⁴Israel aleripa tö harinachka, kè wōtuule iwōlōwōka wa, ese patrē-wã tkã'è idatsi' a iéka ppéka kuli' kī tã imíyal. ³⁵Ie'pa tö orochka ena inukōlchka ena datsi' e' kôs kak kié egiptowak a wēs Moisés tö iyē' iã es. ³⁶Jehová tö egiptowak ké Israel aleripa dalōiök e' kuēkī ie'pa tö íyi kôs kak kiérakitö e' mé Israel aleripa a. Es Israel aleripa tö egiptowak íyi bua'buá e' kôs tsémi.

Israel aleripa e' yélur Egipto a

³⁷Israel aleripa e' yélur Ram-sés, míyal Sucot. Ie'pa wēpa kibineonetke dōka 600.000. Alakōlpa ena ala'rla kè shtaoule.

³⁸Ie'pa tã pē' kua'kīpa mí ñies taië. Nies iyiwak mírak iwã taië obeja ena chibo ena baka. ³⁹Egiptowak tö Israel aleripa ka' e' yōktsã bet kè wã kawō meneat ie'pa a ulōie, e' kuēkī ie'pa wa harinachka mir kè iwōlōwōka tã'. E' wa ie'pa pan yué ñalã kī.

⁴⁰Israel aleripa bak senuk Egipto duas dōka cien tkëyök kī dabom mañayök (430). ⁴¹Ie'pa sené Egipto duas dōka cien tkëyök kī dabom mañayök (430) tas, etã e' nañewe wōshaë tã ie'pa e' yélur Egipto a iditséwō wa iditséwō wa wēs ñippōkwakpa taië es. ⁴²E' nañewe Jehová

tö ie'pa kkö'né buaë as ie'pa e' yòlur Egipto a. E' kuëki nañewé e' kèwö kawõtā tkö'wè wöñine wa duas bit ekkè kekraë Jehová dalöioie.

**Wes Israel aleripa ké
itsatkène e' kèwö tkö'uk**

⁴³Jehová tö iché Moisés ena Aarón a:

“Ye' tö a' tsatkeke egiptowak ulā a e' kèwö tkö'uk a' kawõtā i' es: Ká kuā'ki wakpa esepa kè kawö tā' obeja ö chibo tteke a' tö e' kèwö ska' tā ese chkà katök. ⁴⁴Erè ká kuā'ki wakpa wèpa ena alakölpa wépa to'ttsatke a' tö kanè mésoie ena e' wèpa tottola kkuölit tëule tsir, esepa è tö ikatèmi. ⁴⁵Erè ká kuā'ki wakpa tso' shkar ö kaneblök inuköl klö'uk, esepa kè kawö tā' ikatök. ⁴⁶A' kawõtā chkè e' katök weshke. A' kè kawö tā' chkè e' tsukmi u'rki yës. Nies a' kè kawö tā' idichéwö pukwā. ⁴⁷Israel aleripa ulitane kawõtā kawö e' tkö'uk. ⁴⁸Erè a' shuā ká kuā'ki wak tso' senuk esepa éna kawö e' tkö'wak a' tā Jehová dalöioie e' tā as itö itkö'ünak. Erè kewe ie'pa tö iyamipa wèpa ulitane tso' ie' u a e'pa keraë itöttola kkuölit tök tsir. E' ukuöki tā ie'pa kawö tkö'wèmi a' tā a' yamipae. Erè wépa kè tottola kkuölit tëule tsir esepa kè kawö tā' a' kawö tkö'uke e' chkè katök. ⁴⁹A' ulitane ena ká kuā'ki wakpa serke a' shuā e' kawõtā ttè i' dalöiök nikkèë.”

⁵⁰Israel aleripa tö ttè i' kos iuté wes Jehová tö iché Moisés ena

Aarón a es. ⁵¹E' diwö Jehová tö Israel aleripa yélur Egipto iditséwö wa iditséwö wa wes ñippökwakpa taië es.

13 ¹Jehová tö iché Moisés a: ²“Israel aleripa ala'r wèpa kibi esepa kos dör batse'r ye' a. Nies a' iyiwak alā tsá wèñe e' kos dör batse'r ye' a. E' kuëki e' kos bló ye' a.”

³Etā Moisés tö iché Israel aleripa a: “I'ñe Jehová tö a' yekettsā Egipto a ie' diché taië e' wa. Ká i' a a' weine siarè kaneblök egiptowak a kè patuë tā'. E' kuëki a' er anū diwö i' ska'. A' kè kawö tā' pan yöule iwölöwoka wa ese ñuk. ⁴I'ñe a' e' yökettsā, si' i' kiè Abib e' a. ⁵Mik a' demi ká muk Jehová kablé' se' yépa bak ká iaiaë e'pa a ee, etā a' kawõtā kawö i' tkö'uk si' i' a. Ká e' ki' fyí ulitane tskir buaë, iwā wör buaë shute. Ká e' dör canaánwak, hititawak, amoreowak, heveowak ena jebuseowak, e'pa ká. ⁶A' kawõtā kawö i' tkö'uk i' es: Ká kul shuā a' kè kawö tā' pan yöule iwölöwoka wa ese ñuk. Kawö e' diwö bata, etā kawö tkö'weraë bua'ie Jehová dalöioie. ⁷Kawö kul e' shuā a' kè kawö tā' pan yöule iwölöwoka wa ese ñuk. Pan wölöwoka ena pan yöule iwölöwoka wa ese kos kè kawö tā' se'wè e' tö a' ká kos e' a. ⁸E' diwö tā a' tö ichó a' ala'r a: Kawö e' tkö'weke se' tö, e' wā dör tö Jehová tö se' yè'lur Egipto a. ⁹Ie' tö se' yè'ttsā Egipto a idiché taië wa, e' kuëki se' dör ie' icha. Mik se' tö kawö e' tkö'weke, etā e' tö se' ulitane a ieri meraë as Jehová ttè ki' se' er me'rie. E' dör wes se' e' wakyuò se'

wötsa kḷi ena se' ulà kkue kḷi es. ¹⁰E' kuekḷi a' kawötä kawö e' tkö'uk duas bit ekkè idiwö i' è wa.

¹¹“Ká iaiäe Jehovahä tö iyè'at a' yépa a tö ie' tö canaánwak ká meraë a' a. Mik ie' wä a' demi ká e' a, ¹²etä a' kawötä a' ala'r wëpa kibi esepa kōs blök ie' è ä e'pa kōs dör ie' icha, e' kuekḷi. Nies a' iyiwak parke kōs wè'ñe, e' kibi kōs e' dör ie' icha, e' kuekḷi ese kawötä blè ie' è ä. ¹³Etä obeja wè'ñe pupula ö chibo wè'ñe pupula e' mú a' tö burro alaki e' alà wè'ñe kibi e' skéie burro alà tsatkoie. Erè a' kè ä e' patuak es, e' tä burro alà wè'ñe kibi e' kuli' púwä. Es a' kawötä a' ala'r wëpa tsä kune esepa kōs skéie iyiwak muk itsatkottsä. ¹⁴Aishkuö tä mik a' ala'r tö a' chakeke tö: ‘Ílók a' tö ikanewè i' es?’, etä iütó: ‘Jehová tö se' yé'ttsä Egipto ä idiché taië e' wa. Eë se' bak weinuk siarè kanèblök kè patuè tä'. ¹⁵Mik Egipto blú er tè'wä darèrèë, ie' kè wä kawö mène se' ä e' yöktsane ie' ká ä, etä Jehovahä tö egiptowak ala'r wëpa tsä kune e'pa kōs ttélur. Nies iyiwak alà wè'ñe kibi e' kōs ttéluritö. E' kuekḷi se' tö se' iyiwak alà wè'ñe kibi, ese kōs meke Jehovahä ä. Nies se' ala'r wëpa tsä kune, ese skéie iyiwak mekesö Jehovahä ä itsatkottsä. ¹⁶E' kuekḷi kawö i' tkö'ú as kè a' éna ichòwa tö Jehovahä tö a' yé'ttsä Egipto ä idiché taië e' wa. E' dör wës se' e' wakyuö se' wötsa kḷi ena se' ulà kkue kḷi es.’”

Jehová tö Israel aleripa wëttseke mò wa

¹⁷Mik Egipto blú tö Israel aleripa émi, etä Skéköl tö ibikeitsé tö

Israel aleripa mú kè ñippò filisteo-wak tä, e' tä ie'pa bitumiane Egipto. E' kuekḷi ie' kè wä ie'pa wëttsenemi ñalä michoë filisteowak ká ä e' wa, e' dör ñalä yësyësë. ¹⁸E' kuekḷi ie' tö ie'pa wëttse'emi bánet kamië ñalä tköke ká sir po e' shüä dötsä dayè kiè Dayè Mat e' ska'.

Israel aleripa e' yè'lur dapauleka wës ñippök'wakpa taië e' e' dapa'ù es. ¹⁹Moisés wä José sik këchke e' mítser ie'pa tä ñita. Kam José blër-wä e' yökḷi ie' tö iyè' iëlpa a: “Mokḷi Skéköl dörane a' tsatkök. Mik e' wä tka, etä ye' sik tsúmi a' tä.” Es ie'pa tö kawö mé ñi ä. E' kuekḷi Moisés wä José sik mítser ie'pa tä.

²⁰Etä Israel aleripa e' yélur ká kiè Sucot míyal ká kiè Etam, eë ie'pa e' tséat. Ká e' atë ká sir po e' kkömik tsinet. ²¹Ñiwe tä Jehovahä tö ie'pa wëttseke mò àr taië alabo e' wa. E' mir ie'pa yökḷi kewe ñalä kkachöie ie'pa ä. Nañewe tä mò e' wöñarke bö'wöie dalöburke. E' wä ie'pa shkömir wës ká ñiwe es. ²²Ñiwe tä mò e' mir këkraë ie'pa yökḷi kewe. Nañewe tä mò e' wöñarke bö'wöie e' mir ie'pa yökḷi kewe.

Israel aleripa tkattsä Dayè Mat ä

14 ¹Etä Jehovahä tö iché Moisés ä:

²“Ichó Israel aleripa ä: A' yúne a' itò wane tä a' e' tsúat ká kiè Pi-hahirost e' wöshä. Ká e' atë ká kiè Migdol ena dayè kkömik e' shushä, ká kiè Baal-sefón, e' wöshä. E' wöshä dayè kkömik tsinet úla yuó. ³Es Egipto blú tö ibikeitse-



I' dör karreta tso' ñippoie ese. (Éxodo 14.6)

raë: 'Israel aleripa kè wà ijcher wé imi'mirö. Ie'pa cholurmi ká sir po, e' shuá. 4Erë ye' tó ie' er terawá darërë as ie' tó a' tótiümü. Ye' e' alöraká ie' kî ena inippökwakpa kôs kî, e' wa ye' dalöierdaë taië. Egiptowak ulitane wà ijcherdaë tó mokî ye' dör Jehová."

Etá Israel aleripa tó iwakane-wé es. 5E' dalewa Egipto blú wöki ibiyò demi tó Israel aleripa tkayal. Ie' ena ikuëblupa erbikéne kua'kî tã ichérakitö ñi a: "¿Wes se' tó ì wamblé i' es? ¿lie se' tó Israel aleripa émi tã yi kaneblömiã se' a?"

6E' ukuökî bet tã Egipto blú tó ikarreta tso' ñippoie e' tsuk patké tã inippökwakpa patkéitö ñi dapa'uk. 7Etá imía Israel aleripa itökî karreta ñippoie ibua'buã dökã cien teryök (600) ekkë. Egipto karreta ñippoie e' malepa kôs mírak iwã ñies. Karreta kôs e' ñ inippökwakpa wökir shköke ek ek. 8Jehová

tó Egipto blú er darë'wéwã as ie' mi' Israel aleripa itökî eré ie'pa yënetsã Egipto a Jehová diché taië wa.

9Etá Egipto ñippökwakpa mirwã kabaio kî, karreta kî, e'pa kôs tó Israel aleripa tótiëmi kuérakitö wé Israel aleripa tso' dayë kkömik ká kië Pi-hahirost e' o'mik ena ká kië Baal-sefón, e' wöshãë. 10Mik Israel aleripa isuë tó egiptowak datse, e' tó ie'pa suawé taië. Ie'pa kköché taië Jehová a tó sa' tsatkó. 11Moisés a ichérakitö:

—¿Ima be' iklö'wé pö kè tã Egipto, e' kuëkî be' tó sa' yë'ttsã duökwa ië ká sir po shuã? ¿Iók bö iwamblé es sa' tã? ¿lie be' tó sa' yë'lur Egipto a? 12Kuaë sa' tó be' a iyë' Egipto: 'Sa' múat kaneblök bèrë egiptowak a. iSa' weirke siarë kaneblök egiptowak a, e' dör bua' sa' a duökulur ië ká sí poë a e' skéie!'

13Erë Moisés tó iüté:

—Kè a' tò egiptowak suepaia. E' kuekì kè a' suanuk. A' e' tkówa darërèè. I'ñe Jehovah tò a' tsatkerai e' saü. ¹⁴Kè se' tkinuk ì kì. Jehovah ñippóraè se' skéie.

¹⁵Jehová tò iché Moisés a:

—iKè be' kköchökia ye' a! Ichó ie'pa a tò a' shkó wówí è. ¹⁶Be' shko kéli kóka dayè tsaka as dayè blatënar ñaläie shkotkò poppo dayè shüa. ¹⁷Erè ye' tò ie' er terawa darërè as ie' tò a' tötümi. Ye' e' alórakä ie' kì ena ñippökwakpa kos kì, e' wa ye' dalöierdaè tajè. Egiptowak ulitane wä ijcherdaè tò mokì ye' dör Jehovah. ¹⁸Egiptowak ulitane wä ijcherdaè tò mokì ye' dör Jehovah.

¹⁹E' wöshaè tä Skèköl biyöchökwak mirwä Israel aleripa yökì kewe e' e' mane'wéttsane ie'pa tsikkane. Ñies mò àr tajè alabo e' mía ie'pa tsikkane. ²⁰Es mò e' atë Egipto ñippökwakpa ena

Israel aleripa e' shusha. Egiptowak kke mò ettaie dör ttsettseè, e' kuekì ie'pa tso' ká ttsettse a. Erè Israel aleripa kke mò e' dalöburke tajè ká ñiwe sù. E' kuekì egiptowak kè ulä dè' Israel aleripa ska' e' nañewe.

²¹Etä Moisés ulä kékä dayè tsaka tä Jehovah tò siwä' bitsiwéka darërèè datse diwö tskirke e' èka. E' bitsine nañeè dayè kì. E' tò dayè blatée shusha. Es Jehovah tò ká ulat poppo yué ñaläie dayè shüa ie'pa a shkotkò. ²²Ie'pa tkami ká poppo a. Es dayè wötukì atë wì'kè iö'kè.

²³Etä egiptowak ñippökwakpa mirwä kabaio kì ena karreta kì e'pa kos tò Israel aleripa tötümi dayè a. ²⁴E' bla'mi ká ñirketke etä mò wöñarke bö'wöie e' shüa Jehovah tso' egiptowak sauk. Ie' tò ie'pa suawéka tajè e' tò ie'pa wöa ká chówéka tajè. ²⁵Ñies ie' tò ie'pa karreta wöshki kos e' wötélur dó a as kè ishkò bet. Ie'pa tò iché ñi a:



Dayè wötukì atë wì'kè iö'kè as Israel aleripa tkòmi. (Éxodo 14.22)

—Mishka Israel aleripa yöki.
Jehová tso' ñippök se' ta ie'pa
tsatkoie.

²⁶Jehová tö iché Moisés a:

—Be' ulà kóka dayè tsaka as
iwöierwane Egipto ñippökwakpa ki.

²⁷Moisés ulà kéka dayè tsaka.

Mik ká ñine, eta dayè wöiënewane
es. Mik egiptowak mí tkökshkar, eta
dayè wöiënewa ie'pa ki. Es Jehová
tö ie'pa ewéwa dayè a. ²⁸Es Egipto
ñippökwakpa mineyal Israel ale-
ripa itöki e'pa kos durulune seraa
dayè a ikabaiöë. Egipto blú ñippök-
wakpa e' kè atë yës ttsë'ka. ²⁹Erë
Israel aleripa tkami buaë dayè a dò
wishet ká sí ki, dayè wötuki wì'kè
io'kè e' shusha.

³⁰E' kéwa Jehová tö Israel ale-
ripa tsatkée egiptowak ulà a. Ie'pa
tö egiptowak nu sué dayè kkömik.

³¹Mik ie'pa tö isué tö wes Jehová
tö egiptowak ewéwa idiché tajë e'
wa, eta ie'pa tö ie' dalöié tajë. Ie'pa
er blé ie' mik ñies itteköl Moisés e'
mik.

Moisés tö Jehová kikéka ttsè wa

15 ¹Moisés ena Israel aleripa
ttsé Jehová kikoka ttsè i' wa:

“Ye' ttsöke Jehová dalöioie.

Kabaio tajë ena iwákpa kos e'
ewéwaitö dayè a.

Es ie' e' alé tajë shute ie'pa ki.

²Ye' tso' ttsök Jehová è a.

Ie' tö ye' a idiché mé. Ie' tö ye'
tsatkée.

Ie' dör ye' Këköl. Ye' kawöta
ie' kikökka buaë.

Ie' dör ye' yé Këköl. Ye' tö ie'
dalöieraë er mokj wa.

³Ie' dör ñippökwak darërëë
bua'ie.

Jehová e' dör ie' kiè.

⁴Egipto blú karreta tso' ñippoie
ena ie' ñippökwakpa
e'pa kos émi dayè a Jehová tö.
Egipto blú ñippökwakpa
bua'bua

e'pa kos duolur se Dayè Mat a.

⁵Ie'pa katsirulune dayè shua
wes ak es.

Dayè iskië e' è me'r ie'pa ki.

⁶A Jehová, be' ulà bua'kka
diché tajë,
e' wa be' tö be' bolökpa
batsélor.

⁷Ie'pa demi ñippök be' ta,
erë ie'pa kos ewéwa be' tö be'
diché tajë, e' wa.

Be' uluneka ie'pa ki,
ta ie'pa ñanewa wes kakö sí
es.

⁸Dayè wöikébö darërëë
ta iwöklönewaie wì'kè io'kè
mía wes ká ukuö es.
Dayè wöklönewa, kè
shköku'ia.

⁹Be' bolök e' ttséka tajë ta iché:
'Ye' mi' ie'pa itöki wéyö ikuérö
ta ee ì mirwarak iwa e'
yerattsayö iulà a,
e' wà tierayö kos ye' ki ikiane
ekkë.

Ye' tabë yerattsa inäléka,
e' wa yö ie'pa tterawa.'

¹⁰Erë be' tö dayè wöiké ta e' tö
ie'pa ttélur.

Ikatsinewá dayè a wes tabe-
chka es.

11 A Jehová,
iWépa skà kiekerakitò “skè-
kòl”, esepa kòs tsatà be' dör!
iKè yi dör batse'r taiè wes be'
es!

iKè yi diché tã' taiè wes be' es!
ìl kè or yi a ese wè be' tò buaè,
e' tò sulitane tkiwèwã!
iSulitane kawõtã be' kíkòkka!

12 Be' ulà bua'kka kékã
tã íyök tò ie'pa maléwã.

13 Be' tò sa' tsatkée. Be' éna sa'
dalër taiè,
e' kuèkì be' tso' sa' wëttsuk.
Be' wã sa' mi'ke be' diché wa
dò wé be' wák serke eè.

14 Mik kã ulitane wakpa wã e'
jchenewã,
etã ie'pa painuraè suane è wã.
Filisteowak krardawã suane
è wã,

15 Edomwak wòkirpa chkerdawã
suane è wã,
Moabwak wòkirpa painuraè taiè.
Canaánwak ulitane kèsik kòs
e' chòrawa yès.

16 A Jehová, ias ie'pa tkirwã! ias
ie'pa suar taiè!
Be' diché wa as ie'pa at kè tiriã
suane kuèkì
dò mik sa' ulitane dör be' icha
e'pa tka etã.

17 A Jehová,
Sa' tseramibö dökã be' kabata
buaè e' a.

Eè sa' serdaè buaè kèkraè.
Kabata e' shukitbö be' a senioie.
Eè be' wák e' wé yué e'dör
yöbiè.

18 Jehová tso' se' wëttsuk s'blúie
kèkraè.”

María tò Jehová kíkékã ttsè wa

19 Mik Egipto blú ñippòkwakpa
tkawã dayè a kabaio kì, karreta
kì, etã Jehová tò dayè woiéwãne
ie'pa kì erè Israel aleripa tka buaè
ká poppo a. 20E' ukuökì tã Jehová
ttekòl kiè María, e' dör Aarón kutà,
e' tò ma'ma klò'wéwã ttsoie, tã ala-
kòlpa kòs mí ie' itòkì klötòkerak
es ima'ma blardami. 21E' dalewa
María ttsòke i' es:

iA' ulitane ttsó Jehová kíkoka!
Kabaio ena iwákpa uyéwãitò
dayè a.
Es ie' e' alékã ie'pa kì.

**Jehová tò di' bacha'bachaè
e' bua'wéne.**

22 Moisés tò Israel aleripa ké e'
yòktsã Dayè Mat e' kkòmik. Ie'pa
míyal kã sir poè kiè Sur e' a. Eè
ie'pa shkére kã mañat etã kè ie'pa
wã di' kune yè yès. 23 Mik ie'pa
demi kã kiè Mará, etã eè di' tso'
bacha'bachaè, kè yar ie'pa a. E'
kuèkì kã e' kiè mékarakitò Mará*
24 Etã Israel aleripa tò Moisés
chémi suluè. Moisés chakéraitò:
“¿Ì yèmisö?” 25 Etã Moisés tò Jehová
a ikié tò sa' kímú. Etã Jehová tò ie'

* 15.23 Mará: Hebreoie Mará e' wã kiane chè ì bacha'bacha.

a kal tsitsir kkaché elka e' iéwaitö di' a eta di' baché chowa de buaë yè.

Eë Jehová tö ittè dalöiëno mé ie'pa a, ñies ie'pa ma'wéitö isuqie tö ie'pa tö idalöiëmi. ²⁶E' tö iché ie'pa a: “Ye' dör Jehová. Ye' dör a' Këköl. Ye' dör a' bua'ukwak. Ì cheke ye' tö a' a e' ttsé a' tö, e' iüté a' tö ñies a' sené buaë wes ye' ki ikiane es, e' ta ye' kè tö a' we'ikepa ì sulu patkè'yö egiptowak ki ese wa.”

²⁷E' ukuökì ta ie'pa demi ká kiè Elim. Eë di' tum tso' doka dabom eyök ki böt (12). Ñies ì klò tso' dikò klò sù ese tso' dabom kuryök (70). Eë ie'pa e' tséat di' kkömik tsinet.

Jehová tö Israel aleripa tié chké kiè maná e' wa

16 ¹E' ukuökì ta Israel aleripa ulitane e' yélur ká kiè Elim míyal ká sir poë kiè Sin eë. Ká e' atë Elim ena Sinaí, e' shusha. Ie'pa e' yé'ttsa Egipto e' ki si' de et ki shaböts. ²Eta eë ká sir poë shua ie'pa ttémi taië kësik wa Moisés ena Aarón ki. ³Ie'pa tö iché iarak: —iJehová tö sa' ttópalur Egipto! Eë sa' e' tulökeser ù tulturka wà iëule chikchiè chké wa e' o'mik ta sa' bak iwà katök wé' kos sa' ki ikiane ekké. Erë a' wa sa' dè'bitu ká sir po i' a sa' ulitane ttowa bli wa.

⁴Jehová tö iché Moisés a:

—Súyö pan da'wè siwa' ki a' a. E' shtó ká bit ekké. Erë ishtó kos inar ká etkè ekké è. Ye' ki ikiane suè tö wépa tö ye' ttò iütèmi ena wépa

kè tö ye' ttò iütèpa. ⁵Ká de teröl e' bule es ta a' tö chké kí shtó wè' katar ká böt ekké. Es a' tö iü kekraë.

⁶Eta Moisés ena Aarón tö iché Israel aleripa a:

—I'ñe tsáli ta a' tö isueraë tö moki Jehová tö se' yè'lur Egipto a. ⁷A' ttöke kësik wa e' ttsé ie' tö, e' kueki bule bla'mi ta ie' wák olo taië dalölöe e' sueraë a' tö. Ì cheke ie' tö sa' a e' è chökne sa' tso' a' a. E' kueki a' kè ulurku' sa' ki. A' ulurke ie' ki.

⁸Ñies Moisés tö iché iarak:

—A' ulurke taië e' sué Jehová tö. E' kueki i'ñe tsáli ta ie' tö iyiwak chká patkeraë a' a. Bule bla'mi ta pan patkeraëitö a' a ñè taië kos a' ki ikiane ekké. Sa' kè dör yi, as a' ulur sa' ki. A' ulurke Jehová ki.

⁹E' ukuökì ta Moisés tö iché Aarón a:

—Ichó Israel aleripa a tö a' ttöke kësik wa e' ttsé Jehová tö e' kueki a' e' dapa'ú Jehová wörki.

¹⁰Aarón tso' ttök ie'pa ta, e' dalewa ie'pa ulitane ká sué ká sir po e' éka. Ie'pa isué tö Jehová olo dalölöe dettsa mò tso' ie'pa wëttsuk e' a. ¹¹Eta Jehová tö iché Moisés a:

¹²—Israel aleripa ttöke kësik wa, e' ttséyö. Be' ttó ie'pa ta, ta ichó iarak: ‘I'ñe tsáli a' tö iyiwak chká kateraë. Bule bla'mi ta a' tö pan ñeraë kos a' ki ikiane ekké. Es a' wa ijcherdaë tö ye' dör Jehová, e' dör a' Këköl.’

¹³Ká e' tsáli ta taië dù debitu kakkò sù. E' tö wé ie'pa serke e' wa iéwa seraä. Eta bla'mi ta upa kos shkëne mò wöli è. ¹⁴Mik mò wöli kaneka, eta itòà iski ì atë taklaie

sabubula. ¹⁵E' kè s̄ule Israel ale-ripa w̄a. E' kuək̄i mik ie'pa tō isué, et̄a ie'pa tō iché ñi a: “¿Dió dör ì?” Et̄a Moisés tō iché iarak:

—E' dör pan mé Jehovahá tō a' a ñè. ¹⁶Ie' tō iché tō a' kawōt̄a iuk i' es: A' tō ishtó eköl eköl kōs a' tso' u a e' a ñar ekkè è. Ishtó skátke böt ulatök wák eköl eköl a.

¹⁷Et̄a Israel aleripa ishté wēs ikéwō mène es. Welepa tō ishté bërèbërè, welepa tō ishté kibie. ¹⁸Mik ie'pa tō ima'wé, et̄a wé tō ishté tajè ese icha kè bata ate. Wé tō ishté bërèbërè ese icha deka wè'. Ie'pa ulitane tō ishté eköl eköl kōs ñar ekkè è. Es sulitane ñè wè'.

¹⁹Moisés tō iché ie'pa a: “Kè a' kawō t̄a' pan e' blök dō bule es.”

²⁰Erè welepa kè w̄a Moisés ttò iutène. E'pa tō icha bata blé dō bule es. E' a òña iènek̄a ena ilabunek̄a suluè. E' kuək̄i Moisés ulunek̄a ie'pa ki.

²¹Mik d̄iba ba'nebitu, et̄a pan e' diarolone, e' kuək̄i ie'pa wakpa bik tō ishteke bla'mi kōs ñar ekkè.

²²Erè mik k̄a de teröl, et̄a ie'pa ishté dō ñar k̄a böt ekkè. E' dör skátke tkèl wák eköl eköl a. Et̄a Israel aleripa wōkirpa m̄ia ichök Moisés a. ²³Et̄a Moisés tō iché ia:

—Jehová tō iché tō a' kawōt̄a iuk i' es: Bule dör eno diwö. Diwö e' dör se' a ie' dalöioie. A' kè kawō t̄a' ulök e' diwö wa. E' kuək̄i ì aleke a' tō e' aló ñè. Ibata ate e' bló ñè bule.

²⁴Et̄a ie'pa tō iwé wēs Moisés tō iché es. Ie'pa tō chkè bata e' blé dō

bule es. Et̄a kè ilane sulu, kè ia òña iènek̄a. ²⁵Et̄a Moisés tō iché ie'pa a:

—I'ñe dör eno diwö e' dör se' a Jehovahá dalöioie. I'ñe kè ì kuēpa a' tō ñè u'rki. E' kuək̄i chkè bata ate e' è ñú. ²⁶A' ishtèmi kekraè dō k̄a teröl. Erè e' bule es dör eno diwö, e' diwö kè a' tō ì kuēpa u'rki.

²⁷Et̄a eno diwö shuā ie'pa welepa míyal chkè shtök, erè kè iwā ì kune yēs. ²⁸Et̄a Jehovahá tō iché Moisés a:

—¿E'ma kōs a' tō ye' ttè dalōsewemirö? ²⁹A' éna ñanü tō ye' dör Jehovahá, ye' tō eno diwö me'atbak a' a. E' kuək̄i eno diwö e' chki es ye' tō a' a chkè meke tajè ñè k̄a böt ekkè. E' kuək̄i a' ulitane kawōt̄a senuk wēshke è eno diwö wa. Kè a' patkène bānet.

³⁰E' kuək̄i Israel aleripa enuke diwö e' wa, kè kaneblènerak.

³¹Israel aleripa tō chkè shteke e' kiè mék̄a maná* Iwà chkà dör saruruè wēs suiyök es. E' dör blo'bloè wēs pan yöule bul alí wa es.

³²E' ukuök̄i t̄a Moisés tō iché:

—Kanè i' me' Jehovahá tō se' a: ‘Maná e' ió skátke böt ekkè t̄a ibló a' aleripa a kkachè as ie'pa tō chkè me' ye' tō a' a k̄a sir poè e' a mik a' yè'ttsayö Egipto et̄a, e' saù.’

³³Et̄a Moisés tō iché Aarón a:

—Tka' klö'ú et, e' a maná ió skátke böt ekkè. E' bló Jehovahá wörki as a' aleripa tō isaù.

³⁴Et̄a Aarón tō maná e' blé wé Jehovahá a iyi tso' blèule, e' kélkuö wōshäe wēs Jehovahá tō iyè' Moisés a es.

* 16.31 maná: Hebreoie maná e' wà kiane chè ¿Dió dör ì?

³⁵Israel aleripa bak maná ñuk dò mik ie'pa demi wé pè' serke eë eta. E' dör Canaán kkömik. Ie'pa bak maná ñuk duas dökä dabom tkëyök (40) seraa.

³⁶(Ì wa Israel aleripa tö maná ma'wè, e' kiè ie'pa tö gomer. E' wà dör skátke blublu böt ekkè. E' dör litro böt ulatök.)

Ák a di' dettsa

17 ¹Israel aleripa ulitane e' yélur ká sir po kiè Sin eë ta imía ñalá kī enaena wes Jehová tö iyè' iarak es. Ie'pa demirak ká kiè Refidim, eë ie'pa e' tséat. Erë eë di' kè ta' ie'pa a yè. ²E' kuekī ie'pa tö Moisés a di' kié kësik wa. Ie'pa tö iché ie' a:

—iSa' a di' mú yè!

Moisés iiuté:

—¿Ì kuekī a' tö ye' a di' kié kësik wa? ¿Iók a' tö Jehová wöñatkeke?

³Ie'pa ersine taië e' kuekī ie'pa tö di' kiekerak kësik wa Moisés a. Ie'pa tö iché ie' a:

—¿Iók be' tö sa' ena sa' ala'r ena sa' iyiwak e' yè'lur Egipto a ttèwä ersir wa?

⁴Etä Moisés kköché taië Jehová a ta ichéitö ia:

—¿Wes ye' ie'pa i' wèmi? i'Tsir eta ie'pa ye' ttèwä ák wa!

⁵Jehová tö iiuté:

—Be' yú ie'pa wëttsé keweie. A' kueblupa welepa tsúmiñak. Be' shko kéli wa be' tö di' kiè Nilo

e' buk, e' tsúmi. ⁶Be' yú Horeb kébata* a. Eë ye' be' paneke ák bërie tso' e' ska'. Mik be' tö ák e' ppé be' shko kéli wa, eta di' dora-ttsa taië ie'pa a yè.

Etä es Moisés tö iwakane-wé Israel aleripa kueblupa wörki. ⁷Israel aleripa tö di' ki' kësik wa, e' kuekī Moisés tö ká e' kiè méka Meribá.* Ñies ie'pa tö iyè', “Sa' kè wä iklöne tö Jehová tö sa' kīmēmi.” E' kuekī Moisés tö ká e' skà kiè méka Masá.* Eë ie'pa tö Jehová wöñatkè' e' kuekī.

Amalec aleripa ñippé Israel aleripa ta

⁸Amalec aleripa debitu ñippök Israel aleripa ta Refidim. ⁹Moisés tö iché Josué a:

—Be' tö se' wëpa welepa shushtë tsúmi ñippök Amalec aleripa ta. Bule ye' tso' kabata wöbata kī Skë-köl shko kéli yaar.

¹⁰Etä Josué tö iwakanewé wes Moisés tö iché ia es ta imíyal ñippök Amalec aleripa ta. E' dalewa Moisés ena Aarón ena Hur míyal kabata wöbata kī. ¹¹Mik Moisés ulà kéka, eta Israel aleripa e' alöke ibolökpa kī. Erë mik ie' ulà éwa, eta Amalec aleripa e' alöke ie'pa kī. ¹²Ie' ulà shtrinewä taië, e' kuekī ie'pa ák yulè ie' a e' tkoie. Ñies Aarón ena Hur e'pa tö ie' kímé iulà böt kökka siwa' kī as kè ishrirwä. Es ie' ulà se'wé ñië siwa' kī dò katuine ekkè.

* 17.6 Horeb kébata: Kábata e' kiè ñies Siná kébata.

* 17.7 Meribá: Hebreoie kiè e' wà kiane chë ñippè.

* 17.7 Masá: Hebreoie kiè e' wà kiane chë s'ma'wè.

¹³Es Josué ena Israel aleripa e' aléka Amalec aleripa ki tabè wa.

¹⁴Età Jehová tò iché Moisés a:

—A' ñippè i' e' pakè shtëka yèkkuò ki as a' wakpa kè éna ichòwa kékraë. Ichó Josué a tò ye' tò Amalec aleripa ulitane ewerawa yès.

¹⁵Età Moisés tò ák dapa'wéka ka'ie et iyiwak ña'woie Jehová dalòioie. E' kiè mékqitò “Jehová diché wa se' e' aléka.” ¹⁶Ie' tò iché:

“iYe' ulà kékà Jehová a ikiök as ie' tò se' kìmù!
iJehová ñippöraë Amalec aleripa ta kékraë!”

E' kueki ie' tò ikiè méka es.

Jetró de Refidim Moisés pakök

18 ¹Jetró dör ká kiè Madián e' sacerdote ena Moisés nuaki. * Kòs Skèköl tò Moisés ena Israel aleripa kime', e' jcher ie' wa. Ñies ie' wa ijcher tò wès Jehová tò Israel aleripa ye'lur Egipto a. ²Moisés tò ilaköl Séfora e' patkè'mi iyé ska'. ³Ie' tò ilà busi kiéwa buaë ila'r böl ta. Séfora alà eköl kiè Guersón. Moisés tò iyè': “Ye' sene' ká kuak'ki ki wès ká kuak'ki wakpa es.” E' kueki Moisés tò ikiè méka

Guersón* ⁴Ilà eköl kiè Eliézer. Moisés tò iyè': “Ye' yé Kèköl e' dè'bitu ye' kìmuk. E' tò ye' tsatkè' Egipto blú ulà a.” E' kueki ie' tò ikiè méka Eliézer*

⁵Moisés úla yuéka Skèköl kébata o'mik tsinet. Età ee inuaki Jetró e' de Moisés alaköl ena ila'r böl, e'pa ta. ⁶Jetró tò iché Moisés a:

—Ye' dör Jetró, be' nuaki, ye' debitu be' pakök. Be' alaköl ena be' ala'r böl e'pa de ye' ta ñies.

⁷Moisés e' yéttsa ta inuaki shke'wéitò buaë dalòie wa wöalattsè wa. E' ukuöki ta idewarak weshké. ⁸Wès Jehová tò Israel aleripa tsatké Egipto blú ena egiptowak ulà a ñies wès ie' tò ie'pa kkö'né ì sulu tka ie'pa ta ñala wa eta, e' kòs paké Moisés tò inuaki a.

⁹Kapakè e' tò Jetró ttsè'wé buaë. Jehová er bua' ché taië Israel aleripa a. Ie' tò ie'pa tsatkè'lor

egiptowak ulà a. E' kueki Jetró ttsè'ne buaë. ¹⁰Ie' tò iché Moisés a: —As sulitane tò Jehová kiköka. Ie' tò be' ena be' wakpa kòs tsatkè'lor buaë Egipto blú ena egiptowak ulà a. ¹¹Ire' ye' tò isué tò mokì Jehová dör wépa kiekerakitò “skèköl” esepa ulitane tsata. Yi bak a' we'ikök kèsik wa, e'pa kòs we'ikéitò siarè.

¹²Età Moisés nuaki, Jetró, e' tò iyiwak klò'wéwa etò ña'wéitò Jeho-

* **17.15** *Jehová diché wa se' e' aléka*. Iwakpa ttò wa Moisés tò ikiè *Jehová nisi*, e' wà kiane ché *Jehová dör ye' bandera*. Wèsua e' kiéitò es ie' ulà kékà Jehová a wès bandera kèka es, e' wa ie'pa e' aléka e' kueki.

* **18.1** *Jetró*: E' kiè ñies Reuel, e' dör Moisés tayè kiè Séfora e' yé. Éxodo 2.21 saü.

* **18.3** *Guersón*: Hebreoie s'kiè *Guersón* wà kiane ché *ká kuak'ki wak*.

* **18.3** *Eliézer*: Hebreoie s'kiè *Eliézer* wà kiane ché *ye' Kèköl dör ye' kìmukwak*.

vá a idalöioie. Ñies íyi skà méitö ie' a idalöioie. E' ukuöki ta Aarón ena Israel aleripa kueblupa debitu chkök Moisés nuaki ta Jehová dalöioie.

**Moisés tö s'shulökwakpa
kí yulé**

¹³Bule es ta Moisés e' tkéser ikula' ki Israel aleripa shulök. Ie'pa e' dapa'wé ieter ie' wörki ñië bla'mi dè tsáli as Moisés tö ishulörak. ¹⁴E' kos sué Moisés nuaki tö ta ichéitö Moisés a:

—¿Ì wamlök be' tso' ie'pa ta? Be' è e' tkéser ie'pa shulök ta ie'pa ieter ñië be' panuk.

¹⁵Moisés tö iüté:

—E'ma ie'pa wák de ye' ska' ittök tö ima Skéköl tö ichè. ¹⁶Mik ie'pa welepa ñippöke ñita, eta ie'pa datse ye' ska' ta ye' tö ie'pa ttè shuleke. Ñies ye' tö ie'pa patteke Skéköl ttè wa.

¹⁷Moisés nuaki tö iché ia:

—Wes be' tö iweke e' kè dör buaë. ¹⁸Be' shrirwami. Ñies ie'pa tso' be' wörki e'pa shrirwami. Kanè e' e' alökami be' ki. Kè be' a iwöklönuk ekörla. ¹⁹A Moisés, ye' tö be' patteke e' ttsó. As Skéköl tö be' kimù. Be' kawöta ttök Skéköl ta ie'pa skéie. Be' kawöta ie'pa ñippöke e' chök Skéköl a as ie' tö ichè be' a tö wes ishuleke. ²⁰Ie'pa wöbla'ú Skéköl ttè wa. Ikkachó ie'pa a wes ie'pa kawöta senuk yesyésë. Ichó ie'pa a tö ì kiane Skéköl ki tö ie'pa tö iwè. ²¹Erè be' kawöta a' wépa shushtök tseë be' kimuk ttè shuloie. Wépa serke yesyésë, Skéköl dalöieta' taië, kè e'

watauta'ttsa ì sulu wambloie, esepa shushtó Israel aleripa shulök be' ta. Ishulökwakpa blató i' es. Israel aleripa mil biyök (1000) e' kos ki ishulökwakpa múka eköl eköl. Mil biyök e' kos blabatsólor cien eyök (100) cien eyök dökä dabop. Cien biyök e' kos ki ishulökwakpa múka eköl eköl. Cien biyök e' kos blabatsólor dabom skeyök (50) dabom skeyök. E' kos ki ishulökwakpa múka eköl eköl. Dabom skeyök kos e' blabatsólor dabom eyök dabom eyök dökä skel. E' kos ki ishulökwakpa múka eköl eköl. ²²Ie'pa tö Israel aleripa kos ttè shuleraë këkraë be' skéie. Erè ttè wé kè shulinuk ie'pa a ese bituraë ie'pa wa be' ska' shulè. Ttè wé shulirmi ie'pa a e' ta ese shuleke ie'pa tö. Eta es be' ki kanè e' östömi. Ie'pa tö be' kimèmi kanè e' wa. ²³Skéköl tö be' ké iwakanéuk, ñies be' tö iwakanewé es, e' ta be' a ikatatkérmi. Ñies Israel aleripa kos mi'mine iu a ttsé'ne buaë.

²⁴Eta Moisés tö inuaki ttò iüté. Iwakanewéitö wes inuaki tö iché ia es. ²⁵Ie' tö Israel aleripa shua wépa didir ese shushté. E'pa mékaitö Israel aleripa shulökwakpaie. Welepa meneka mil biyök e' kos ki ishulökwakpaie. Welepa skà meneka cien biyök e' kos ki ishulökwakpaie. Welepa skà meneka dabom skeyök e' kos ki ishulökwakpaie. Welepa meneka dabom eyök e' kos ki ishulökwakpaie. ²⁶Ie'pa tö Israel aleripa ttè shuleke këkraë. Ttè wé darërë, ese mí ie'pa wa Moisés a

shulè. Età ttè wé tottola, ese shuleke ie'pa tò. ²⁷E' ukuöki tã Moisés nuäki e' chéat ie' a tã imiáne ikaska'.

Israel aleripa demi Sinai

19 ^{1,2}E' ukuöki tã Israel aleripa e' yélur Refidim a demirak Sinai. Ie'pa e' yè'lur Egipto, e' ki si' de böt kí ká et. Sinai dör ká sir poè. Ee ie'pa e' tséat Sinai kébata o'mik tsinet. ³Etã Moisés míã kabata a ttök Skököl tã. Ee Jehová tò ikié tã ichéitö ia:

—Ttè cheke ye' tò be' a e' chöne Israel aleripa a. E'pa dör Jacob aleripa. ⁴Ichó ie'pa a: 'Ye' tò egiptowak we'ik e' su' a' tò. Nies a' wã ijcher tò wes ye' wã a' dè'bitu buaè íe ye' wörki wes pu wã ilala mi' ipik ki es. ⁵Ká ulitane wakpa dör ye' icha. Erè ye' ttö iüté a' tò sèraa, nies ttè mekesö ñi a e' wã iüté a' tò buaè, e' tã ká ulitane wakpa shua a' döraè ye' icha chókíe. ⁶A' döraè ye' sacerdotepaie. A' döraè batse'r ye' a.' Ttè i' kos chó Israel aleripa a.

⁷Etã Moisés biteane, e' tò Israel aleripa kuèblupa kos dapa'wé. Ì ché Jehová tò ie' a e' kos chéneitö ie'pa a. ⁸Ie'pa ulitane tò iüté ñikkëè:

—Ì kos ché Jehová tò e' wã iüteraè sa' tò.

Etã Moisés míane ttè e' chökne Jehová a. ⁹Etã Jehová tò iché ia:

—Ye' ttö ttsó. Mochka tèrdawa kabata ki taiè e' shua ye' datse ttök be' tã as Israel aleripa ulitane tò ye' ttöke be' tã e' ttsò. Es ie'pa tò be' ttè kl'weraè kekraè.

Etã ima Israel aleripa tò iüté e' chéne Moisés tò Jehová a. ¹⁰Jehová tò iché ia:

—Be' yú Israel aleripa batse'uk i'ñe ena bule. Nies ichó iarak: 'a' datsi' skuólor.' ¹¹Ye' dör Jehová, e' datse böiki Sinai kébata a ie'pa ulitane wörki, e' kuèki ie'pa batse'ú as ie'pa tso' batse'r böiki yöki. ¹²Kábata wakyuó shkit as kè yi mi'tkö e' wishet. Ichó iarak: 'A' kè a kawö tã shkökwã iwakyöne e' wishet. Nies a' kè a kawö tã shkökwã tsinet ipamik. Wépa tkawa e' wishet esepa duörawã. ¹³Yi míwã ee ese kè kawö tã kè ulà wa. Ese kawöta ttèwã ák wa ö sulè wa. Kè a' tkinuk tò se' idir ö iyiwak idir, a' kawöta ittökwa. Mik a' tò duk blar ttsé e' è tã a' dömiwã tsinet kabata o'mik.'

¹⁴Etã Moisés biteane tò Israel aleripa batse'wé tã ie'pa ulitane datsi' skuélor. ¹⁵Moisés tò iché ia:

—A' ulitane e' kk'ónú batse'ne böiki yöki. E' dalewa kè a' senukka alaköla tã.

¹⁶Böiki es bla'mi tã kabata a ká wöñane alá blane taiè. Mò taiè dettsã kabata e' ki. Ie'pa tò ittsé tò duk blane taiè, e' tò ie'pa suawé taiè painékaie. ¹⁷Etã Moisés tò Israel aleripa tso'rak iwákpa u a' ie'pa yélur tsémi Skököl wörki. Ie'pa e' wöklö'wérak kabata kuli' a tsinet. ¹⁸Jehová dettsã Sinai kébata ki bö' shua, e' kuèki kabata e' míã shklé ème. Shklé e' wér wes të shklé butrò es. Kabata kos wötírke darèrèè. ¹⁹Duk kí blarke taiè shute. Moisés ttöke tã Skököl tò ie' iüteke alá blar ttsèè.

²⁰Jehová dettsã kabata kakkëè, e' wöbata ki tã Moisés kiékaitö ee.

Moisés tkaka ee, ²¹ta Jehovaha tö iché ia:

—Be' e' ówane ta ichó ie'pa a: 'Kè a' tkökbity wé iwakyöule e' iöshet ye' weblök dö' ie'pa duòlur taië.' ²²Nies wëpa kanebloke ye' a sacerdotepaie esepa kawöta e' batse'uk buaë dö' nies ye' tö ie'pa ttèlurmi.

²³Eta Moisés tö Jehovaha iuté:

—Be' tö sa' ké iwakyuök as kè ie'pa döwa kabata a tsinet. E' kueki kè ie'pa bitúpa kabata i' a.

²⁴Eta Jehovaha tö iché Moisés a:

—Be' yúne ta Aarón tsúbitu e' ta. Erë a' sacerdotepa ena Israel aleripa malepa e'pa kè kawö ta' shkökbity wé ye' tso' ee dö' ye' tö ie'pa ttèlur.

²⁵Eta Moisés biteane Israel aleripa ska' ta ì ché Jehovaha tö ie' a e' chéne ie' tö ie'pa a.

Ttè dalöiëno dökä dabop

20 ¹Skököl tté ta ichéitö i' es: ²“Ye' dö'r Jehovaha. Ye' dö'r a' Këkö'l. Ye' tö a' yè'lur Egipto wé a' bak weinuk siarë kanè wa ee.

³“Kè a' kawö ta' këkölpa skà dalöiök. Ye' è dalöiö a' Këkölie.

⁴“Kè a' kawö ta' ì diököl yuök dalöiè yës. Ì kos tso' ká jai a ena ká i' a ena dayë a ena iyök dikia, e' kos diököl kè yuar a' tö dalöiè.

⁵⁻⁶Ye' dö'r Jehovaha. Ye' dö'r a' Këkö'l. A' tö këkölpa kuak'ki dalöié, e' kè dalé'ttsénuk ye' a. Wépa ye' suë suluë esepa we'ikeraëyö, nies ileripa dò inukökopaë e'pa we'ikeraëyö. Erë wépa tö ye' dalëritseke ena ye' ttè dalöiëno

e' iuteke, esepa ena iëtkuöpa dökä mil e' dalëritseraëyö. E' kueki kè a' e' tulökwa kuchëwö ki iyi ñekkë kos wörki idalöioie.

⁷“Ye' dö'r Jehovaha. Ye' dö'r a' Këkö'l. Ye' kiè kè aritsar éanas iyi sulu wambloie. Yi tö e' wamblé ese wák we'ikeraëyö.

⁸“Eno diwö e' bló Ye' è dalöioie. E' kè chökwa a' éna. ⁹Semana bit e' a kawö tso' kul. Kawö teröl e' dö'r a' wákpa a kanebloie. ¹⁰Erë kawö teröl e' bule es e' dö'r eno diwö ye' dalöioie. E' kéwö a a' kè kawö ta' kaneblok. Nies a' ala'r ena a' kané mésopa ena a' iyiwak ena ká kuak'ki wakpa serke a' ska', e'pa kos kè kawö ta' kaneblok e' diwö a. ¹¹Ye' dö'r Jehovaha. Ye' tö ká i' ena ká jai ena dayë ena iyi ulitane e' kos yö' ká teröl shua. E' bule es ta ye' eni', e' kueki kawö e' batseoyö me'atyö a' a eno diwöie ye' dalöioie.

¹²“A' yé ena a' mi e'pa dalöiö as a' ser ká taië ká mekeyö a' a' a' a.

¹³“Kè a' kawö ta' s'ttökwa.

¹⁴“Kè a' kawö ta' s'senewabak dalöseukwa.

¹⁵“Kè a' kawö ta' akblök.

¹⁶“Kè a' kawö ta' s'kkatök kachè wa.

¹⁷“Kè a' kawö ta' o'ka u kkechök. Nies ilaköl ena ikané mésopa, alakölpa ö wëpa, ena iiyiwak kos ena ì kos tso' iwa, ese kè kkechar.”

Israel aleripa suane Skököl yöki

¹⁸Mik Israel aleripa ulitane tö alá blarke e' ttsé ena iwöñarke e' suë nies duk blarke taië e' ttsé

ena shkḷe butrōkeka taiē kabata a
e' sué, etā e' yōkḷi ie'pa suane taiē
painékarak taiē. Ie'pa iēter isaḷuk
kamiē. ¹⁹E' kueki ie'pa tō iché Moi-
sés a:

—Be' ttó sa' tā, etā sa' tō be' ttò
dalōieraē. Erē kè sa' kḷi ikiane tō
Skékōl ttò sa' tā dō' sa' duòlur.

²⁰Moisés tō iiuté:

—Kè a' suanuk. Skékōl dettsa
a' ma'uk isuqie tō mokḷi a' tō ie'
dalōieke. Ie' kḷi ikiane tō a' tō ie' ttò
dalōiè as kè a' tō ì sulu wamblò.

²¹Ie'pa atē isaḷuk kamiē. Moisés
è míā tsinet mò taiē wé Skékōl tso'
ee.